

SAN JUAN

De'o Cocapi Paj De'ose'e

1 ¹Ja yë'ta'a yequë co'amaña pa'ima'në iti coca tsoe paji'i. Iti coca cato Maija'quë ja're paji'i. Iti coca cato Diusupi. ²Du'ru huëo macana Maija'quë ja're conì paji'i, iti cocapi. ³Ipi Maija'quë ja're conì co'amaña de'huapi. Peoji, i de'hua ma'ñe, si'aye i de'huase'e a'ë. ⁴Ini paji'i, ti pani huesëye. Ti pani huesëyepi paire miacaiye pa'iji. ⁵Iye miañepi nea hue'ñare pana miacaji'i. Miacaina, neañepi ne yayo ti'lañe papi.

⁶Pa'iji, Maija'quë jëjo daoquë Juan hue'equë. ⁷Jaë cato iti miañe ñasiquëpi quëacaiquë paji'i, i cayere care paji cuasani si'a paj asajajë caquë. ⁸Juan cato miañe peopi. Jaë cato coa miañe ñasiquëpi quëacaiquë paji'i. ⁹Nuñerepa si'a paire miacaiyepi iye yejana titapi.

¹⁰Ipi Diusu ja're pa'i iye yeja de'huasiquëta'are iye yeja pa'icohua'ipi ire papi cajë asaye pahüë. ¹¹I paire pana daji'i. Daisiquëta'are i paipi ite de'oye sihuajë yo'oye pahüë. ¹²Jaje jai paj pajëta'are de'hue te'ohua'ise'e sihuajë ite nuñerepa Cristo huasoquë api cuasajë asahuë. Jaje ite cuasasicohua'ini nuñerepa Maija'quë mamajërepa pa'iyepi nepi. ¹³Paj mamajëje pa'iohua'i peoyë. Diusu mamajë cato, Diusupi necaina, i mamajë de'osicohua'i ini pa' ai de'oyepi ai de'oma'cohua'i a'ë. Panita'a coa yëjë yo'oyepi ai de'ose'eje pa'iohua'i peoyë.

¹⁴Cristopi paj de'oni mai ja're conì paji'i, paire oiquëre papi, cui'ne nuñerepa pa'ipi. Jaje pa'ini i de'oque pa'iyerepa ñahuë, yëquëpi, Maija'quë Mamaquërepa te'i macapi, ai de'oque'erepa pa'ina. ¹⁵Jaje pa'ina, Juan Cristo do'ire ca'aji'i, ñeje:

“Iquë api, yë'ë mësarute quëasiquë. Jaëni yë'ë quëahuë. Yë'ë jeteyo'je daiji, jerepa pa'i. Yë'ë peo'në pa'isiquë ca'aji'i.”

¹⁶De'oye pa'iyepi ti'ahuë, i do'ipi. ¹⁷Cuãnese'e cato Moisésja'a Maija'quëpi isise'e a'ë. Cui'neje paire oiye, cui'ne nuñerepa yo'oye cato Jesucristoja'a isise'e a'ë. ¹⁸Te'ijë Diusure ñasiquë peoji. Coa i mamaquë i ja're conì pa'iquëse'e. Jaëse'e ñapi. Maire quëa inopi, i pa'iyepi aye.

Jesucristo Ayere Juan Cacaise'e
(Mt. 3.11-12; Mr. 1.7-8; Lc. 3.15-17)

19 Jerusalén pa'i judío ëjaohua'ipi Maija'quë huë'e ñaicaohua'ire cui'ne levitasre jëjo saoreña, Juanre iquei'ni më'ë cajë seni asaja'cohua'ire.

20 Jaje jëjo saoreña, sani sejëna, Juanpi tiñarepa quëaëña:

“Yë'ë cato Cristo Maija'quë paire huasoquë peoyë.”

21 Jaje caquëna, seni coreña:

“¿Jaje pa'ito iquei'ni, më'ë, tsoe hue'ña Maija'quë quëacaiquë pa'isiquë?”

Cajëna, Juanpi caëña:

“Pani.”

Yeque seni coreña:

“Jaje pa'ito ¿Maija'quëre quëacaiquë daija'quë api ca nëosiquë aë, më'ë?”

Jaje catojë sehuouña:

“Pani.”

22 Ja maca careña:

“¿Iquei'ni, jaje pa'ito? ¿Me yëquëre jëjo daosicohua'ire sani quëaja'cohua'i a'ni? Më'ë ayere quëajë'ë, yëquëre.”

23 Cajëna, Juanpi caëña:

“Yë'ë cato yë'ose'e cuëne yejapi cuiquë a'ë: ‘Nui ma'arepa hui'yoyj'ë, Èjaë daija'a ma'a.’ Maija'quëre quëacaiquë Isafas caquë pa'ise'eje caquë a'ë, yë'ë.”

24 Juanre sani casicohua'i cato fariseo paipi jëjo saosicohua'i paë'ë.

25 Jaohua'ipi seteña, ite:

“Cristo peoni, cui'ne Elíasje peoni, cui'ne Maija'quë jëjo daosi'i casiquëje peoni, ¿Me yo'oquë cui'ne oco doquë'ni?”

26 Cajëna, Juanpi caëña:

“Yë'ë cato oco doquë aë. Jaje pa'iquëta'are mësarü ja're conï pa'iji, mësarü ña ti'ama'quëje. 27 Jaë cato yë'ë jeteyo'je daija'quë api, yë'ëre tëto saisiquëpi. Yë'ë cato do'ï peoyë, i zapato joyecaiyeque.”

28 Iye cato Betábara hue'e hue'ñana yo'ose'e a'ë, Jordán tsiaya ësä mëi t'e'tena Juan oco do hue'ñana.

Maija'quë Yëi Ñamapi, Jesús

29 Se ñatasi mu'se Jesupi Juan quë'rona tsio daina, ñaquë caëña, Juan:

“Ñaj'ë. Iquë api, Maija'quë Yëi ñama iye yeja pa'icohua'i tayo yo'oye nejocaiquë. 30 Yë'ë jaëni cahuë: ‘Yë'ë jeteyo'je daiji, yë'ëre tëto saisiquë. Jaë cato yë'ë peo maca pa'isiquë api.’ 31 Yë'ëje huesëhuë. Iquei'ni cuasahuë. Jaje pa'iquëta'are ocopi dohuë, Israel paipi ñajajë caquë.”

32 Caëña, Juan yequeje:

“Yë'ëpi ñahuë, Maija'quë de'o joyopi ma'tëmopi su'teje pa'ipi ina cajeni pëaquëna. 33 Yë'ë cato ja yë'ta'a huesëhuë, iquei'ni cuasaquë. Jaje pa'iquëta'are

yè'ère oco dojè'è caquë cuañesiquëpi capi: 'Mè'ëpi oco doquë ñaquëna, de'o joyopi cajeni ìna pëasiquëpi. Jäë api, paire Maija'quë de'o joyopi doquë.' 34 Jaje pa'ina, yè'è ìti ñasiquëpi quëacaiquë pa'iyë, Maija'quë Mamaquëre papi caquë."

Jesús Ì Ye'yacohua'ire Du'ru Macarepa Nese'e

35 Se ñatasi mu'se Juan cui'ne ì ye'yacohua'ì conì paè'è, ja'rè pa'isi macare. 36 Pa'ijëna, Jesús da saina, ñaquë Juan capi:

"Ñajè'è. Jäë api, Maija'quë Yëi ñama."

37 Jaje Juan caquëna, asani ì ye'yacohua'ìpi cayaohua'ì Jesure tuteña.

38 Jaje tuijëna, Jesupi asani co'ye ñani caëña, jaohua'ire:

"¿Iquere co'eye'ni?"

Caquëna, johua'ìpi careña:

"Ye'yaquë, ¿Mè'è jerona pa'iquë'ni?"

39 Cajëna, Jesupi capi:

"Dani ñajè'è, yè'è pa'ì hue'ña."

Caëna, ì pa'ì hue'ñana sani ñani ì ja're pëani paè'è, cuatro pa'ì maca tì'asicohua'ìpi ìti mu'se na'ì macaja'a.

40 Juan caquëna, asani tuisicohua'ì aquë cato, te'ì Andrés paji'ì, Simón Pedro yo'jei. 41 Ja yè'ta'a yeque yo'oma'nè du'ru macarepa cato Andrés, maja'yë Simónni sani co'epi. Tì'ani capi, ìte:

"Tì'ahuë, yèquë, Mesías maire huasoquë."

42 Jaje quëani Andrés sai saëña, Simónre Jesús quë'rona. Saquëna, ñani Jesupi caëña:

"Mè'è cato Jonás mamaquë Simón'è. Jaje pa'iquëta'are Cefas hue'equë pa'ijè'è. Jaje canì Pedro caye a'è. (Mai coca canì quëna pë caye pa'ìji.)"

Jesús Soise'e Felipe Cui'ne Natanaelre

43 Se ñatasi mu'se Jesús Galilea yeja quë'rona sasi'ì caquë yo'ouquë, Felipe tì'api. Tì'ani capi:

"Tuijè'è, yè'ère."

44 Iquë Felipe cato Betsaida daripë aquë paji'ì, Andrés cui'ne Pedro pa'ì hue'ña aquë. 45 Ñani ja maca Felipe Natanaelre co'ese'e caquë sani tì'ani ìte capi:

"Ai tsoe Maija'quëre quëacaicohua'ì cui'ne Moisés toyaquë pa'isiquëni ñahuë, yèquë. Jäë cato Jesupi José mamaquë Nazaret daripëpi aquë api."

46 Caquëna, Natanaelpi capi:

"¿Nazaret daripëpi de'o pai eta tì'añe pa'iquë?"

Caquëna, Felipepi capi:

"Dani ñajè'è, ìni."

47 Natanaelpi Jesús quë'rona tsiojaina, Jesús capi:

"Nuñerepa Israelita macapi daiji, iquë cosoye peoquëpi."

48 Jaje caquëna, Natanaelpi sequëña:

"¿Me yè'ère ñaquë'ni?"

Caquëna, Jesupi capi:

“Ja yë'ta' Felipe mël'ère soima'në ñahuë, Higuera soquë yë huë'ehuëre mël'è nëca maca.”

49 Ja maca Natanaelpi capi:

“Ye'yaquë, mël'è cato Diusu mamaquë a'ë. Judío pai ëjaëre pa'ë, mël'è.”

50 Caquëna, Jesupi sehuopi:

“¿Coa Higuera soquë yë huë'ehuëre pa'i maca ñahuë case'ere nuñerepa Ëjaëpi caji caquë asaquë, mël'è yël'ère? Ai jerepa pa'yere, mël'è ñaja'quë a'ë, jeteyo'je.”

51 Yequeje Jesupi capi, ite:

“Nuñerepa cayë. Ma'tëmo hui'yosicopi pa'iona, Diusu huiñaohua'ipi mëisicohua'ipi cajesicohua'ipi Pai Mamaquëni cajë yo'ojëna, ñaja'cohua'i a'ë.”

Caná Daripëna Huejase'e

2 ¹Toaso mu'seña sa tëto sai maca Caná daripëre hueja fiesta paquëña, Galilea yejare. Jarote Jesús pëca ja'coje pacoña. ²Jesús cui'ne i ye'yacohua'i coní hueja fiestana soi cuañoisicohua'ipi pa'ijë sateña. ³Cuiya'i o'sa carajaisi maca, Jesús pëca ja'copi cao:

“Cuiya'i o'sa yure peoji.”

4 Cacona, Jesupi sehuopi:

“¿Nomio me yo'oco jaje yël'ère caco'ni? Yël'è yo'o maca ja yë'ta' tì'añë paji.”

5 Jaje catoje iopi cao, paire necaicohua'ire:

“I cayeje yo'ojë'ë.”

6 Jarote seis quëna yurupëa paji'i, judío pai si'si cuya tojë yo'o yurupëa. Te'e yurupë cato veinte panita'a veinticinco galones doye paji'i. ⁷Jesupi paire necaicohua'ire capi:

“Iye yurupëana ocore do'e timëjë'ë.”

Caëna, do'e timëreña. ⁸Do'e timërena, Jesupi capi:

“Yure cato a'ri maña doni fiesta yo'oye ñacaiquëna sacaijë'ë.”

Caëna, jaje yo'oreña. ⁹Sarena, fiesta yo'oye ñacaiquëpi, ocopi cuiya'i cono de'ose'ere neñapi, huesëquë. Iti ñajë ocopi yurupëana dosicohua'ise'e jal'ë cuasahuë. Jaje neñani fiesta yo'oye ñacaiquëpi huejaquëre soini capi:

10 “Si'a pai du'ru macarepa cato de'o cuiya'i conore pare ucucua.

Ai ucusi macarepa jeteyo'je a'ri maña de'o cuiya'i cono ocucua. Jaje pa'liquëta'are mël'è cato ai de'o cuiya'i conore pare de'huahuë.”

11 Jesús Caná daripë Galilea yejana pai yo'o tì'a ma'ñere yo'ose'e cato du'ru macarepa yo'o ñnose'e paji'i, i de'oquërepa pa'iyere. Jaje yo'ouna, ite ye'yecohua'i ire papi cuasahuë.

12 Iye yo'o tējisi jeteyo'je Capernaum daripëna saji'i, pëca ja'co, yo'je tsj, cui'ne i ye'yacohua'i coní saijëna. Sani jarona pa'ë, a'ri maña mu'seña.

Jesupi Maija'quë Huë'ere Tsoa Toşe'e
(Mt. 21.12-13; Mr. 11.15-18; Lc. 19.45-46)

¹³Israel pai Egíptopi etajë pa'ise'ere cuasajë judío pai yo'o mu'seña t'la tējiquëna, Jesupi Jerusalénna saji'i. ¹⁴Sani t'api, Maija'quë huë'ere curiquë neñu'u cajë duruhuequëre isicohua'i, cui'ne yëi ñamare isicohua'i, cui'ne su'tere isicohua'i cui'ne curiquë cambiacohua'i ja'rusicohua'ipi ñu'ijëna, ñani. ¹⁵Jesupi iohua'ire si'seja'core neni yureta'a si'a paire co'amaña isicohua'ire yëi ñamare cui'ne huequëre coní te'epi curiquë cambijë ñu'icohua'ini eto saoni iohua'i curi topëa jea ña'ne saocai, cui'ne mesa saihuëaje jël'je taño saocaji'i. ¹⁶Su'tere isicohua'ini capi: “¡Eto saojë'ë, iño pama'pë! ¡Yë'ë Ja'quë huë'ere co'amaña huero huë'e neni yo'oma'pë!”

¹⁷Ja maca i ye'yacohua'ipi toyase'e cayere cuasa ñajateña, ñeje cayere: “Si'aye yë'ë pa'iyë më'ë huë'ere cuasani ñacai yo'oyë.”

¹⁸Ja maca judío paipi Jesure sei'ë:

“¿Iquepi më'ë iñoja'quë a'ni, më'ë cuañequë pa'iyë iye yo'okuë?”

¹⁹Cajëna, Jesupi sehuopi:

“Nejojë'ë, iye huë'ere. Jaje yo'ojëna, yë'ëpi coa toaso mu'señapi nesi'i, cui'naoni.”

²⁰Caquëna, judío paipi careña:

“Cuarenta y seis ometëcarepa nesicore ¿me më'ëpi coa toaso mu'señapi huë'e nesi'ni?”

²¹Jaje Jesús caní i capëre capi, huë'ere pare caye paipi. ²²Jaje pa'ina, Jesús ju'isiquëpi huëisi maca i ye'yacohua'ipi cuasa ñajateña, i iye case'ere. Cui'ne ja maca toyase'e case'eje nuñerepa care pa'ë cajë asahuë.

Si'aohua'ire Jesús Ñaquë Api

²³Jesús Jerusalénre pa'i pai yo'o t'la ma'ñere yo'okuëna, ñani jai pai ite ire paipi cajë asahuë, Israel pai Egíptopi etase'ere cuasajë yo'o fiesta pa'i maca yo'okuëna. ²⁴Jaje pa'iquëta'are Jesús cato pai cuasayere ñani pai nuñerepa cayë cuasaye paipi, si'aye pai cuasaye ñaquë sëte. ²⁵Paipi ite dani jaje yo'okuë api iquë cajë quëa t'la'ne peopi, tsoe ise'e asapi, pai joyo cuasajë pa'iyë.

Jesús Cui'ne Nicodemo

3 ¹Paji'i, te'i fariseo Nicodemo hue'equë. Jaë cato ëjaërepa paji'i, judío pai aquë. ²Jaje pa'ipi Nicodemo ñami Jesure ñasi'i caquë, sani capi, ite: “Ye'yaquë, asayë, më'ëre Diusupi ye'yaja'quëre jëjo daosiquëpi pa'i, pai yo'o t'la ma'ñere yo'okuë tutu iñoquë cui'ne si'aye yo'okuëna. Paise'e pa'ini jaje yo'o t'la'ne peoji, Diusupi coní yo'oye pato.”

³Caquëna, Jesupi capi, ite:

“Nuñerepa më'ëre cayë, pëca ja'coja'a t'ë'ya daise'eje pa'ye tijupë t'ë'ya dani cuañoma'quë pani Maija'quë cuañë te'te ña'ne peoji.”

⁴Caquëna, Nicodemopi seji'i, ite:

“¿Me jaje aipi pëca ja'cona caca conì tèt'ya dani cuañoñe pa'iquè'ni? ¿Me jaje yo'oye pa'iquè'ni?”

⁵Caquëna, Jesupi sehuopi:

“Nuñerepa mè'ère cayë. Cui'naëpi pëca ja'co tèt'ya daise'eje pa'ye ocopi cui'ne joyopi tèt'ya dani cuaño'maquë cato Maija'quë cuañe tē'te cacaye peoji. ⁶Pëca ja'quëohua'ì paipi parena, tèt'ya daisicohua'ì cato jare pai pa'iyë. Joyopi tèt'ya daisicohua'ì cato jare joyo acohua'ì pa'iyë. ⁷Ai cuasama'ë pa'ijë'ë. Yè'ëpi ñeje cato: ‘Si'a pai huajëye ai de'oye pa'iji.’ ⁸Tutu cato si'a hue'ña daicoa, io pisiyese'e asajëna. Jaje pa'iquëta'are huesëyë, io dai hue'ña cui'ne io sai hue'ñaje. Si'a joyopi tèt'ya daisicohua'ì cato, tutujë pa'iohua'ì pa'iyë.”

⁹Jaje caquëna, Nicodemopi seji'ì:

“¿Me jaje yo'oye pa'iquè'ni?”

¹⁰Seina, Jesupi sehuopi:

“¿Mè'ë judío paire ye'yaquëre pata'a huesëquë'ni, iye? ¹¹Nuñerepa mè'ère cayë, yëquë asayere, cui'ne iti ñase'ere quëayë. Jaje pa'iquëta'are mësarupi nuñerepa cayë cajë asaye pañë. ¹²Iye yeja ayere quëaquëna, asama'pë panì ai jerepa asaye peoji, yè'ëpi ma'tëmo ayere quëato.

¹³Pai mañaje ma'tëmo mëni ñama'cohua'ì a'ë. Coa iti hue'ñapi Pai Mamaquë daisiquëse'e asaji, ma'tëmo aquëse'e. ¹⁴Moisés añare cuene yejana neni soquë tarapëna tëoni huëo nëcoquë pa'ise'eje cui'ne Pai Mamaquëje huëo nëco cuañoja'quë api. ¹⁵Si'ahua'ì ite secohua'ìpi ne huesëma'pë ti panì huesëyere pajajë caquë.

Maija'quë Paire Oise'e

¹⁶Si'a paire oi do'ire Maija'quëpi ì mamaquë te'ì macani isipi, si'a pai ite, nuñerepa ire papi, cajë cuasacohua'ìpi ne huesëma'pë, ti panì huesëjajë caquë. ¹⁷Diusu mamaquëre jëjo daoma'ë paji'ì, paire nejoja'quëni. Jëjo daopi, huasoja'quëni.

¹⁸Diusu mamaquëre nuñerepa ì api caquë cuasaquëpi nejosiquë peoji. Jaje pa'iquëta'are ire papi caquë cuasama'quëpi nejosiquë pa'iji, Diusu mamaquëre asama' do'ire. ¹⁹Ire papi cajë cuasama'cohua'ì cato nejosicohua'ì a'ë, miañepi iye yejana daisiquëta'a nea hue'ñare miañe jerepa yëhuë, ìohua'ì yo'oyepi co'a do'ire. ²⁰Si'a pai co'ayere yo'ocohua'ìpi miañere coecohua'ì a'ë, ìohua'ì yo'oyepi tiñarepa ña cuaño'maquëni cajë. ²¹Jaje pa'iquëta'are de'oyerepa yo'ojë pa'icohua'ìpi tsio daiyë, miañena. ìohua'ì yo'oye cato Diusupi yëni còcaina, yo'oye a'ë cajë iñoñu'u cajë.”

Jesús Ayere Juan Ca Cose'e

²²Ja jeteyo'je Jesús ì ye'yacohua'ì ja're conì Judea yejana saji'ì. Jarote tsoe maca ìohua'ì ja're pa'ì oco doquë yo'opi. ²³Juanje ja mu'seña cato Enón què'rore oco doquë paji'ì, Salim ja'ye macare, jarote ocoje ai pa'ì

do'ire. Si'a p̄ai i qu'ero daisicohua'i oco do cuañosicohua'i paë'è. ²⁴Iye cato ja yè'ta'a Juanre tseani coma'nè yo'ose'e a'è.

²⁵Ja maca Juan ye'yacohua'i acohua'ipi judío p̄ai ja're sañope yo'ojè careña, si'si tosa toñe ayere cajè. ²⁶Jaohua'ipi Juanre sani careña:

“Ye'yaquè, asajè'è, mè'è ja're coni Jordán tsiaya oco doquè pa'isiquèpi, mè'è yèquère quèasiquèpi. Yure cato ocore doquèna, jai p̄ai ise'ena saiye.”

²⁷Cajèna, Juanpi capi, jaohua'ire:

“Maija'quèpi isima'què pa'ito yecohua'ije jaje yo'o tutu paye peoji. ²⁸Tiñarepa yè'è quèahuè, mésarute. Cristo peoyè caquè, cui'ne quèahuè yè'è cato ite ne de'huacaiquè du'ru jèjo daosiquè a'è. ²⁹Se ñajè'è, cui'ne hueja fiesta jè'què huejaja'core paquè api, iti huejaquèrepa. Huejaquè cajei cato cocare asaquè, sihuaquè ñu'iquè api. Jaje yè'èje yure asaquè sihuayè, i ayere cajèna. ³⁰Jaè cato jero sa'ana jerepa pa'i pa'ija'què api, yè'è cato coa jero sa'na do'i peoquè de'oja'què aè.”

Ma'tèmo Aquèpi Daiye

³¹Èmèje'pi daiquè cato si'a p̄aire tètò saisiquè api. Iye yeja aquè cato jare iye yeja aquè api. Jaje pa'ina, yeja cocare caji. Jaje pa'iquèta'are ma'tèmo daiquè api, si'a p̄ai jerepa pa'i. ³²Jaje pa'ina, ñase'ere cui'ne asase'ere quèaji. Quèaquèta'are p̄ai'pi nuñerepa caji cajè asaye pañè, i cayere. ³³Nuñerepa caji caquè cuasasiquè pani, Maija'què nuñerepa caquè api cacaji. ³⁴Jaje pa'ina, Maija'què jèjo daosiquè cato Maija'què cocare caji, Maija'què èseye peoyerepa i de'o joyore isiquèna. ³⁵Pèca ja'què oiji, i mamaquère. Jaje pa'ina, si'aye i jèñase'ena jèopi, yo'ojaquè caquè. ³⁶Pai Mamaquère ire papi caquè cuasaquèpi ti pani huesèja'què api. Jaje pa'iquèta'are asama'è coequè cato ja pa'iyè peoji. Peoquèpi coa ai jerepa Maija'què pèi sañèna sai cuañèja'què api, co'ayerèpa.

Samaria Paire Jesús Case'e

4 ¹Jesupi Juan seña maca ite tuicohua'ire paquèpi cui'ne jai p̄aire oco doquè yo'o'ji asareña, fariseo p̄ai. ²Nuñerepa Jesupi oco doye papi. Coa i ye'yacohua'ipi oco dohuè. ³Jaje Jesús asani Judea yejapi etapi, Galileana sasi'i caquè.

⁴Co'i maca Samaria yejaja'a tètò saiye paji'i. ⁵Pa'ina, daiquèpi Samaria yeja daripè Sicar titapi, Jacobo mamaquè Josère yeja isiquè pa'isico quèrona. ⁶Jarote Jacobo oco coje paji'i. Ma'aja'a dai jè'josiquè sète Jesús oco coje yè'què macana ja'rupi. Mu'se joporepa paji'i, ja maca cato. ⁷⁻⁸Ye'yacohua'ipi p̄ai daripèna aine hueroñu'u cajè saè'è. Satena, ja maca te'i ñu'ina, Samaria nomiopi oco easi'i caco daco'è. Dacona, Jesupi capi: “Ocore isijè'è, yè'ère.”

⁹Jaje caquèna, Samaria nomiopi sehuoo:

“¿Mè'è judío paita'a, me yo'oquè yè'è Samaria nomioni oco hueroquè'ni?”

(Judío p̄ai cato Samaria paire tsioma'cohua'i a'è.) ¹⁰Ja maca Jesús sehuopi:

“Diusu mē'ère isīye asaco pani, cui'ne mē'ère oco sequēreje jaē api asaco pani, mē'ēpi yē'ère setira'huē. Seona, yē'ēpi pa'i ocore pare isira'huē, mē'ère.”

¹¹ Caquēna, iopi cao:

“Ējaē, ¿jepi mē'ē oco eani isisi'ni, yē'ère? Iti eayeje peoquē, cui'ne oco coje cato huaicoa. ¿Jero ayere pa'i ocoje yē'ère isisi'ni? ¹²Iye oco coje cato yēquē ai Jacob necaisicoa. Jaje icona ije cui'ne i mamajēje cui'ne nēicohua'ije ucujē pa'ahuē'ē. ¿Mē'ēpi cuasani i jerepa pa'i a'ē cuasaquē?”

¹³ Cacona, Jesupi sehuopi:

“Si'ahua'i iye oco ucucohua'i cato si'anē oco ēaquēna, pa'iyē. ¹⁴Jaje pa'iquēta'are yē'ē isi oco ucusiquē cato cui'naēpi oco huēoye peosipi. Yē'ē oco cato sa'nahuēre papi oco coje tsa'iñeje pa'ye etaquēna pasipi, ti pani huesēye isiyepi.”

¹⁵ Ja maca cao iopi:

“Ējaē, jaje pa'ito ja ocore isijē'ē, yē'ère, cui'naopi oco ēaye peoye, cui'ne iye oco coje ea daiye paja'core.”

¹⁶ Cacona, Jesupi capi:

“Mē'ē ējēre soijani ja maca daijē'ē, iñona.”

¹⁷ Caquēna, iopi cao:

“Ējēre peocoa'ē.”

Cacona, Jesupi sehuopi:

“Ējēre peocoa'ē cani peore paco cayē, mē'ē. ¹⁸Ja'nē cato mē'ē cinco ēmēohua'ire pahuē. Yure mē'ē paquē cato mē'ē ējē peoji. Peocoa'ē cani mē'ē care pahuē.”

¹⁹ Jare asani iopi caco:

“Ējaē, mē'ē cato Maija'quēre quēacaiquē a'ē asayē, mē'ère. ²⁰Yēquē aiohua'i Samaritano pai iye cutihuēna Maija'quēre sejē pa'ahuē'ē. Jaje pa'iquēta'are mēsaru judío paipi Jerusalēna Maija'quēre seña pa'iji, cacohua'i a'ē.”

²¹ Cacona, Jesupi sehuopi:

“Care paji cuasajē'ē, nomio. Maija'quēre coa si'a hue'ña pa'ijē seña tī'api. Ja maca cato ai cutihuēna panita'a Jerusalēna sani seña peosipi. ²²Mēsaru Samaria pai cato huesējē coa señē. Yēquē judío pai cato asajē señē. Huaso coca cato judío pai tsēcapē aye a'ē. ²³Tsoe iti macarepa tī'api. Yure a'ē, Maija'quēre secohua'irepa joyore papi nuñerepa cuasajē yo'o maca. Jaje yo'oyere ai yēji, ja'quē. ²⁴Diusu cato joyo api. Jaje pa'ina, ite secohua'ije joyo ayere papi yo'oye pa'iji, nuñerepa yo'oyepi.”

²⁵ Caquēna, Nomioipi cao:

“Yē'ē cato asayē, Mesías, maire huasoquē Cristopi dani jaēpi si'aye quēaja'quē api.”

²⁶ Cacona, Jesupi capi:

“Yē'ē a'ē, ipi mē'ē ja're coca caji.”

²⁷ Jesús jaje cocare caquēna, i ye'lyacohua'ipi tītareña. Nomio ja're Jesús coca caquēna, quēquē ñareña. Jaje ñajēta'a seni asañu'u iquere yē caē'ni,

panita'a ique cocare nomio ja're caè'ni cajë señe pahüë. ²⁸Ja maca io yurupë iti macana ñoni pai daripëna sani cao:

²⁹“Dani ñajë'ë, yë'ë yo'ose'ere si'aye casiquëni. ¿I Cristo pa'ima'quë?”

³⁰Ja maca asani, paipi Jesús quë'rona saë'ë. ³¹Ja yë'ta'a pai daima'pëna i ye'yacohua'ipi Jesure cahuë:

“Ye'yaquë, ao aijë'ë.”

³²Cajëna, ipi capi:

“Mësaru ña ma'ñere yë'ë cato payë, yë'ë ai ja'ñe.”

³³Jaje caëna, ja maca i ye'yacohua'ipi sa'ñe iohua'ija'a seteña:

“¿Paipi dacatena, ani cama'quë?”

³⁴Cajëna, Jesupi capi:

“Yë'ë ao cato yë'ëre jëjo daosiquë yëyeje yo'oye a'ë. Cui'ne i co'amaña ne saocaiye a'ë. ³⁵Mësarupi cacohua'i a'ë: ‘Ja yë'ta'a cuatro ñañëohua'i carapi, tëaye.’ Jaje cacohua'ita'are yë'ëpi cayë: Ñani cuasajë'ë, tase'ere tsoe querepi, tëa ja'ñe. ³⁶Tëaquëje sai cuañoñe pa'iji, iti ca tëase'e cato ti pani huesëye a'ë, iti taquë cui'ne iti tëaquë si'a yë'quë maca sihuaye pa'iji caquë. ³⁷Nuñerepa caji. Pai case'e je'quë ñeje: ‘Iti taquë cato yequë api cui'ne iti tëaquë cato yequë api.’ ³⁸Yë'ëpi mësarute jëjo saohuë, tëajë'ë caquë, mësaru ai yo'ojë ta ma'ñere. Jaje pa'ito yecohua'ipi nerena, mësaru cato coa tëacohua'i a'ë.”

³⁹Jai pai Samaria acohua'i Jesure ire papi cajë cuasahuë, nomio case'ere cuasajë. Jao cato cao, “Yë'ë yo'ose'ere si'aye capi.” ⁴⁰Jare Samaria pai asani Jesure se'ë, pëajë'ë cajë. Cajëna, asani caya mu'seña pëapi. ⁴¹Ai jerepa ire papi cuasajë asahuë, ipi i ayere quëaquëna. ⁴²Ja maca Nomiore cahuë. Yureta'a ire papi cuasayë, yëquë. Më'ë case'e asacohua'ipi, cui'ne yure yëquëje asa con i caquëna, ja do'ire asayë. Nuñerepa Cristo api, iye yeja huasoquë cajë.

Pai Èjaë Jo'yaë Mamaquëre Jesús Jujuse'e

⁴³Caya mu'seña Samaria pëasiquëpi Galilea yejana saji'i. ⁴⁴Jare ipi Jesús ca'ajji'i, Maija'quëre quëacaiquëre i quë'ro acohua'i cato coecohua'i a'ë. ⁴⁵Galilea ti'asi maca de'oye ite pëpahuë. Jaohua'i cato, Jesús Jerusalénre pa'i de'oye yo'oquëna, ñasicohua'ipi pëpahuë. Egítopi Israel pai etajë pa'ise'ere cuasajë yo'ojë te'e sani ñasicohua'ipi.

⁴⁶Ja maca Jesús Caná daripëna co'ipi, Galilea yejana, i ocore cuiya'i o'sa cono ne sitona. Jarote pajji'i, pai ëjaërepa yo'oye ayere co'aiquëpi. Jaëpi mamaquëre Capernaum yejare ju'liquëre paquëpi. ⁴⁷Jaje paquëpi pai ëjaëre pare co'aiquëpi Jesús, Judea yejapi Galileana dajji'i asani, sani Jesure ñapi. Naquë seji'i, yë'ë huë'ena sani yë'ë mamaquë juni huesë tëjiquëre jujucaijë'ë, caquë. ⁴⁸Ja maca Jesupi capi:

“Mësaru nuñere pa'ë cuasajë asaye pañë, pai yo'o ti'a ma'ñere yo'o iñoñe pato.”

⁴⁹Jaje caquëta'are pai ëjaëre pare co'aiquëpi capi:

“Èjaë, esa daijë'ë, yë'ë mamaquë ja ju'ima'ne.”

⁵⁰Caquëna, Jesupi ja maca capi:

“Co'ijë'ë, më'ë huë'ena. Më'ë mamaquë huajëquëpi pa'iji.”

Caquëna, care paji cuasaquë asani saji'i, i huë'ena. ⁵¹I huë'ena je'nërepa ti'acquëna, ñani i jo'yapi ite ñañu'u cajë etani ite cahuë:

“Më'ë mamaquë huajëquë pa'iji.”

⁵²Jaje cajëna, ipi seji'i:

“¿Ique hora pa'i maca huajëquërepa paquë'ni?”

Caquëna, iohua'ipi cahuë:

“Ñamina'a mëñerepa sa të'yo maca, una pa'i maca ja maca suña dahuë tëto saji'i.”

⁵³Jaje cajëna, tshua'ë pëca ja'quëpi asani cuasa ñajaquëña, jare ja hora pa'i maca Jesús, “më'ë mamaquë huajëquëpi pa'iji” case'ere. Jaje ñani i cui'ne si'a huë'e pa'icohua'i Jesure nuñerepa i api cajë asareña.

⁵⁴Iye yo'ose'e cato cayaye aco paco'ë, pai yo'o ti'a ma'ñere Jesús yo'ose'e, Judeapi, Galilea co'isi maca.

Betsaida Aquëre Jesús Jujuse'e Cu'ima'quëni

5 ¹Ja yo'osi jeteyo'je judío paipi fiestare yo'ohuë. Yo'ojëna, Jesuje co'i copi, Jerusalëna. ²Ja daripëre yëi ñama hue'yosi eta sa'ro paji'i. Pa'ina, jaõ yë'quë macare ocore tëhuosi dea pëpi Betesda mami hue'eco paco'ë. Hebreo pa'i coca cato jaopi cinco huajëjë ñu'i pepëa quë'io paco'ë. ³Jarote jai pai ju'icohua'i pëasicohua'ipi uë'ë, peo yejare. Si'a ju'i dahuë ju'icohua'i paë'ë: ñama'cohua'i, do'pëcohua'i, cui'ne quë'quësicohua'i. Jaohua'ipi utejë paë'ë, oco da'capi, tu'ejaço cajë. ⁴Jarona te'e mañase'e huiñaëpi cajeni ocore tu'equëna, ñani du'ru du'isiquëpi ja jeteyo'je co'yaye pa'iji, coa si'a ju'i dahuë hue'equëje. ⁵Jarote paji'i, treinta y ocho ometëca ju'iquë. ⁶Jaje pa'ipi, uina, ñani Jesús ite tsoe jaje ai yo'oquë pa'iyere asaquë seji'i, ite:

“¿Co'yaye yëquë, më'ë?”

⁷Caquëna, ju'iquëpi sehuopi:

“Ëjaë, yë'ëre oco da'cana jëjo dëoni ma oaquëpi peoji. Jaje pa'ina, oco tu'e maca tsoe yequëpi du'iji, ja'a yë'ë dusi'i caquë yo'oquëna.”

⁸Caquëna, Jesús capi:

“Huëni më'ë caico macare ini sai huëojë'ë.”

⁹Jaje ca maca tsoe co'yasiquë paji'i. Pa'i i caicore ini sai huëopi. Jaje pa'iquëta'are ja mu'seña cato huajë mu'se paji'i. ¹⁰Jaje pa'i do'ire judío paipi cahuë, iti juju cuañosiquëre:

“Iye mu'se cato huajë mu'se a'ë. Më'ë caicore hue'eye peoji.”

¹¹Cajëna, ipi sehuopi:

“Yë'ëre jujusiquë cato ‘më'ë ui caicore ini saijë'ë, capi.’ ”

¹²Caquëna, ja maca seteña:

“¿Jequëpi më'ëre ‘më'ë ui caicore ini saijë'ë’ caë'ni?”

¹³Cajëna, huesëña iti jujusiquëre Jesús cato jai pai jopoja'a sani huesëña, ña cuañoñe peoye. ¹⁴Jaje yo'osiquëpi jeteyo'je Maija'quë huë'ena ti'ani ite caëña:

“Ina, yure mël'ë huajëquë pa'iyë sëte, cui'naëpi tayo co'ayere yo'oma'ë. Yo'oquëna, jerepa mël'ëre co'aye ne cöco.”

¹⁵ Jaje caëna, ja maca sani judío paire quëapi, Jesús paji'i, yë'ëre jujusiquë caquë. ¹⁶ Ja do'ire judío pai Jesure huani jëoñu'u cajë cui'ne josa yo'ohuë, huajë mu'sere yo'osi do'ire. ¹⁷ Jaje pa'iquëta'are Jesupi capi:

“Yë'ë Ja'quë si'anë co'amaña nequë api, cui'ne yë'ëjë co'amaña yo'oyë.”

¹⁸ Jaje casi do'ire jerepa judío pai huani jëoñu'u cajë yo'ohuë. Huajë mu'sere sehuoma'ë yo'osi do'ise'e pa'iyë papi. Jerepa ipi Diusujë pa'i a'ë caquë cui'ne Diusu api, yë'ë ja'quë ca do'ire yo'ohuë.

Maija'quë Mamaquëpi Si'a Tuturepa Paye

¹⁹ Ja maca Jesús capi, jaohua'ire:

“Nuñerepa mësarute cayë. Diusu mamaquë cato ise'e cuasayepi yo'oye peoji. Pëca ja'quë yo'oquëna, ñase'ere yo'oquë api. Si'aye pëca ja'quë yo'oyere mamaquëjë yo'oquë api. ²⁰ Jaje pa'ina, mamaquëre oiji. Pëca ja'quëpi ja do'ire i yo'oye iñoji. Cui'ne iye yo'ose'e jerepa pa'yere iñoja'quë api. Jaje yo'oquëna, mësaru merepa yo'oquë'ni cuasaja'cohua'i a'ë, ña quëquëjë. ²¹ Pëca ja'quë ju'isicohua'ire cui'naohua'ini huajëcohua'ire huëoni pa'iyë isiyejë pa'ye, cui'ne i mamaquëjë isiji, pa'iyë, i isiye yëquëna. ²² Ja'quë cato pai yo'oyere ña de'huama'aji'i. Paquë mamaquëna isipi, pai yo'ojëna, ñaquë ne de'huaja'a tutu. ²³ Ja do'ire mamaquëre de'oquëre papi caja'cohua'i a'ë, pëca ja'quëre cayepi. Pëca ja'quë jëjo daosiquëni de'oquëre papi caye pani pëca ja'quërejë de'oquëre papi caye peoji.

²⁴ Nuñerepa cayë, mësarute. Yë'ë caye de'hue asacani, cui'ne yë'ëre jëjo daosiquëre ire papi caquë cuasasiquëpi ti pani huesëye paji. Nejoñe peoji, ite. Junì huesëyepi ti pa'iyena tëto saisiquë api. ²⁵ Nuñerepa, cayë, mësarute. Titàji, hora. Yure iti maca'ë, ju'isicohua'ipi Diusu mamaquë yë'ore asaja'a maca. I caye asani sehuocaicohua'ipi pa'lja'cohua'i a'ë. ²⁶ Ja'quë cato pa'iyë paji. Jaje paquëpi mamaquëre pa'iyë isipi. ²⁷ Jaje cui'ne pai yo'oye ne de'huaja'a tutujë isipi, Pai Mamaquëre. ²⁸ Iyere asani ai cuasama'pë pa'lj'ë. Quëare payë. Ju'isicohua'i tasicohua'ipi si'aohua'i i yë'o asaja'a maca tija'coa. ²⁹ Asani tasi daripëapi etaja'cohua'i a'ë, si'aohua'i. De'oyerepa yo'osicohua'ipi ti pa'iyena huëija'cohua'i a'ë. Jaje pa'iquëta'are co'ayere yo'ojë pa'isicohua'i cato coa nejaja'cohua'ipi huëija'cohua'i a'ë.

Jesús Cuañequërepa Pa'iyë Quëaye

³⁰ Ja'quëre ja seni asama'ë yë'ëse'e cuasayepi nejoñe peoyë. Yë'ë cato yë'ëre cuañese'ëjë caquë a'ë, tayo yo'ocohua'ire. Yë'ë yo'oye cato nuñerepa yo'oye a'ë. Yë'ë yëyejë yo'oye coeyë. Ja'quë yë'ëre jëjo daosiquë yëyepi yo'oquë a'ë. ³¹ Jaje pa'ina, yë'ëpi co'ye yë'ëja'a de'oye yo'oyë caquë pa'ito yë'ë caye care paji cacaiquë peora'pi. ³² Jaje pa'iquëta'are pa'lji, yë'ë yo'oye ñaquëpi yë'ëre de'oye cacaiquë. Jaje pa'ina, yë'ëre i cacaiye cato nuñerepa do'i pa'lji.

³³Mësarupi Juanre seni asaja'cohua'ire jëjo saoreña. Sejëna, Juanpi nuñerepa sehuopi, jaje pa'ire paquëna. ³⁴Iye cato cayë mësarupi huaso cuãñosicohua'li pa'lijajë caquë yë'ë cato paipi de'oye cacaiyere co'ema'ë pa'iyë. ³⁵Juan cato toa tsëo pë miañeje miacaiquë paji'li. Jaje pa'ina, mësarupi i miañere sihuacaicohua'li pa'ë'ë, coa nëhui tëcahuë. ³⁶Juan yë'ëre cacaise'e jerepa de'oye yë'ëja'a co'ye quëaye payë. Yë'ë yo'oye cato ja'quë yë'ëre yo'ojë'ë caquë cuãñe nëose'e a'ë. Jaje pa'ina, japi quëaji, yë'ë nuñerepa ja'quë jëjo daosiquë pa'iyë.

³⁷Ja'quë yë'ëre jëjo daosiquë cato, quëaji, yë'ë nuñerepa de'oye yo'oquë pa'iyere, mësarupi i yë'lo asama'cohua'li pa'itoje cui'ne ite ñama'cohua'li pa'itoje. ³⁸I coca itire pa'ë cajë cuasama' do'ire i coca mësarute cacaye paji, pëca ja'quë jëjo daosiquëre coe do'ire. ³⁹Mësarupi cato Maija'quë coca tayoye peoye ye'yeyë, ti pani huesëyere itire ñajë ti'añu'u cajë. Jaje pa'iquëta'a ja toyase'e cato yë'ë ayere caji. ⁴⁰Jaje yëjëta'a yë'ëna daiye coeyë, ja pa'iyë paja'cohua'ita'a.

⁴¹Yë'ë cato co'ema'ë pa'iyë, paipi de'oquëre papi cajë yo'oyere. ⁴²Asayë, mësarupi nuñerepa Maija'quëre oima'cohua'li pa'iyë. ⁴³Yë'ë cato ja'quë pa'li huë'ñapi daisiquë a'ë. Jaje pa'iquëta'are mësarupi asaye coeyë. Coa pa'ise'e huë'ni co'ye ire pa'ë caquëni cuasacohua'li a'ë, mësarupi de'o'ji cajë. ⁴⁴¿Me mësarupi asaja'cohua'li a'ni, pa'ija'a sa'ñe de'oquëre papi cajë yo'ocohua'ipi? ¿Me yo'ojë Diosupi mësarute de'oquëre papi cayere co'e ma'ñe'ni? ⁴⁵Cuasama'pë pa'ijë'ë. Yë'ëpi yë'ë ja'quë ña huë'ñana mësarute do'li quë'iohua'li a'ë, caja'quë api cajë. Mësarute sa'ñope caquë cato Moiséspi mësarupi necaiquë api cajë utejë pa'iquë. ⁴⁶Jaje pa'ina, mësarupi Moisés case'e care paji cajë asacaicohua'li pani yë'ëreje asacatira'huë, Moisés cato yë'ë ayere toya do'ire. ⁴⁷Jaje pa'ina, mësarupi Moisés toyase'ere asacaima'cohua'li pani, ¿Me yë'ë cayë asacaiye'ni, care paji cajë?"

Cinco Mil Ęmëohua'ire Año

(Mt. 14.13-21; Mr. 6.30-44; Lc. 9.10-17)

6 ¹Ja jeteyo'je Jesús Galilea jairana je te'tena saji'li. Jare iti jairapi Tiberias yequë mami hue'eco paji'li. ²Jaje saina, jai pai tuë'ë, pai yo'lo ti'a ma'ñere yo'oquë, ju'licohua'ire jujuquëna, ñasicohua'ipi. ³Ja maca Jesús i ye'yecohua'li ja're ai cutihuëna mëni ja'rupi. ⁴Egíptopi Israel pai etajë pa'ise'ere cuasajë judío pai yo'lo maca ti'añe ja'li maca paji'li. ⁵Pa'ina, ja maca Jesús jai pai ite tuijëna, ñani Felipe capi:

“¿Jerona ao hueraja'cohua'li a'ni, jai pai ai ja'ñe?"

⁶Ja cato capi, Felipe neñasi'li caquë, Jesús cato tsoe i ne ja'ñe pa'ina.

⁷Jaje caquëna, Felipe sehuopi:

“Docientos romano quëriqui të'ñapi pan hueroto ti'añe paji, te'e panpë te'ireje.”

⁸Ja maca Andrésapi Jesús ye'yaquëpi Simón Pedro yo'jeipi capi:

⁹“Iñore te'e tsihua'ë cinco pan cui'ne caya tsiaya hua'ire paquë pa'iji.

¿Ja maña pato me jai paire ti'laquë'ni?"

¹⁰Ja maca Jesupi capi:

“Si'a paire cajë'ë, ja'rujajë.”

Ai taya paquëna, taya ëmëje'ena jai pai ja'rureña. Ëmëohua'ise'e cinco mil pai paë'ë. ¹¹Ja maca Jesús cinco pan ìni Diusure de'oji caquë pëpani ja jeteyo'je ì ye'yacohua'lina isipi. Isina, ì ye'yacohua'ipi paire se aohuë. Jare cui'ne tsiaya hua'ireje yo'opi. Si'aye ìohua'i yëye necaji'i. ¹²Tsoe ìni huajësicohua'i pa'ijëna, Jesupi capi, ì ye'yacohua'ire:

“Àni jujase'e tsi'sojë'ë, coa nejoñe peoja'quë.”

¹³Caëna, tsi'sohuë, ìni jujase'e. Tsi'sojë doce do'rohuëa timëhuë, cinco pan pa'ise'epi jaiye nese'ere. ¹⁴Ja maca Jesús yo'ose'ere ñani, paipi cahuë: “Iquë nuñerepa Maija'quëre quëcaiquë api, iye yejana daija'quë api ca nëosiquë.”

¹⁵Jaje pa'iquëta'are Jesús asapi, ìohua'i yëyepi coetoje ëjaëre pare neñu'u cuasaye. Jaje pa'ina, jaohua'ire jeoni ai cutihuëna saji'i, te'i.

Jesús Ëmëjeja'a Cu'ise'e
(Mt. 14.22-27; Mr. 6.45-52)

¹⁶Ñami de'osi maca Jesús ye'yacohua'ipi jairana cajehuë. ¹⁷Cajeni yohuëna aya mëni Capernaum yejana je'e huëohuë. Ja maca cato tsoe ai neapi, cui'ne Jesuje ja colima'ë paji'i. ¹⁸Ja maca ai tutuquë cui'ne ai to'a huëopi. ¹⁹Cinco kilómetros panita'a seis kilómetros pa'i macare pa'ijë ñahuë, Jesupi yohuë quë'rona daina, oco da'ca ëmëje'aja. Jaje ñani ai ca'rahuë. ²⁰Jaje ca'rajëna, ipi capi, jaohua'ire: “ÿë'ë a'ë. Ca'rama'pë pa'ijë'ë!”

²¹Ja maca sihuajë yohuëna daijë'ë cajë yo'oye ìnohuë. Cui'ne ja maca aya mëquëna, ì ja're conì esarepa ìohua'i cajë saisi yejana ti'ahuë.

Paipi Jesure Co'eye

²²Se ñatasi mu'se jaira je te'tena pëasicohua'ipi cuaca ti'ahuë. Te'le yohuë pa'isicoja'a ì ye'yacohua'ipi saë'ë. Saijëna, Jesuse'e ìohua'i ja're saiye papi cajë. ²³Jaje cuasajë pa'ijëna, Tiberias daripëpi jaiye yohuëa daji'i, ìohua'ire pan Èjaëpi neni ao sito quëno macana. ²⁴Jaje Jesús cui'ne ì ye'yacohua'i peojëna, ñani yohuëana aya mëni Capernaum yejana saë'ë, Jesure co'eñu'u cajë.

Jesu Api Pa'iyere Isi Pan

²⁵Jaira je te'tena ti'ani Jesure seteña:

“¿Ye'yaquë je yëhua ti'taë'ni, ìño?”

²⁶Cajëna, Jesupi capi:

“Nuñerepa mësarute cayë. Mësaruru cato yë'ëre co'eyë, coa panre timëñerepa ìni ñani. Co'emapa'pë pa'iyë, pai yo'o ti'a ma'ñere ñasi do'ire asa ti'añe. ²⁷Coa carajai aore cajë ai yo'oma'pë pa'ijë'ë. Ai jerepa ti pani huesë aore pare cajë yo'ojë'ë, quëcoyere pare. Iyere Maija'quë mamaquë cato isija'quë api, mësarute. Ja'quë Diusupi yë'ëna ja tuture isipi.”

28 Jaje caquëna, ìohua'ipi se'ìe:

“¿Me yo'oja'cohua'i a'ni, yèquë Diusu yèyere necañu'u cani?”

29 Cajëna, Jesupi sehuopi:

“Diusu yèye cato ì jëjo daosiquëni care paji cajë cuasacaiye a'ë.”

30 Jaje caquëna, ìohua'ipi se'ìe:

“¿Iquere mè'ë yo'o ìñoja'quë a'ni, paì yo'o ti'a ma'ñe yèquëre mè'ëre care paji cuasajë asaja'cohua'ire? 31 Tsoe acohua'i a'ahuë'ë, manare cuëne yeja pa'i maca. Jare toyase'e cato: ‘Diusupi ma'tëmo panre aopi,’ caji.”

32 Cajëna, Jesupi sehuopi:

“Nuñerepa cayë, mësarute. Moisésipi ma'tëmo panre aonë papi, yè'ë ja'quë api, nuñerepa ma'tëmo panrepa aocuë. 33 Diusu ìsi panrepa cato, ma'tëmopi paire ti pani huesëye ìsiquë daisiquë api.”

34 Ja maca ìohua'ipi cahuë:

“Ja panse'e yèquëre ìsijë'ë, Èjaë.”

35 Cajëna, Jesupi capi:

“Yè'ë a'ë, pan pa'ìye ìsiquë. Yè'ëna daisiquë cato aì èaye peosipi. Cui'ne yè'ëre ìre papi caquë cuasasiquë cato oco èaye peosipi. 36 Yè'ë mësarute case'eje pa'ye yè'ëre mësarupi ñajëta'a ìre papi cajë cuasaye pañë. 37 Ja'quë yè'ëna, ìsìcohua'ì cato si'ahua'ì yè'ëna daiyë. Yè'ëna daisìcohua'ìre cato eto saoye paja'quë a'ë. 38 Yè'ë cato ma'tëmopi yè'ë yèyeje yo'osi'ì caquë daiye pahuë. Yè'ëre jëjo daosiquë yèyere yo'osi'ì caquë daisiquë a'ë. 39 Yè'ë ja'quë yè'ëre jëjo daosiquë cato ì yè'ëre ìsìcohua'ìni te'ìre ne huesocaiye peoye de'oye yè'ëpi ñacaiyere yëji. Cui'ne yè'ëpi tëji mu'serepa ju'ìsìcohua'ìni huëocaiyere yëji. 40 Yè'ë ja'quë cato si'ahua'ì Maija'quë mamaquëre ñani ìre papi cajë cuasasicohua'ìpi ti pani huesëyere yëji. Yè'ëna, yè'ëpi tëji mu'serepa ju'ìsìcohua'ìni huëosi'ì.”

41 Ja maca “yè'ë a'ë, ma'tëmopi cajesì pan” casi do'ìre judío paipi ìte cue'cue huëohuë. 42 Cue'cuejë cahuë:

“¿Iquë Jesús pa'ìma'quë José mamaquë maipi ì pëca ja'quëre cui'ne pëca ja'core ñacohua'ì pa'ì ma'ñe? ¿Jaje pa'ìta'a me yo'oquë ma'tëmopi daisiquë a'ë, caquë'ni?”

43 Jaje cajëna, Jesupi capi:

“Cue'cueyere jëojë'ë. 44 Yè'ëna te'ohua'ì dani ti'añe peoji, yè'ëre jëjo daosiquëpi ja'quëpi ìte dama'quë pa'ìto. Jaëni yè'ëpi tëji mu'serepa huëoja'quë a'ë. 45 Maija'quëre quëacaìcohua'ì toyajë pa'ìse'epi caji ñeje: ‘Diusupi ye'yaja'quë api, si'a paire.’ Jaje pa'ìna, si'ahua'ì ja'quëre asacohua'ìpi cui'ne ìte ye'yecohua'ìpi daiyë, yè'ëna.

46 Ja'quëre pajje ñama'cohua'ì a'ë. Diusu quë'ropi daisiquëse'e ìte ñaquë api. 47 Nuñerepa cayë. Yè'ëre care paji caquë cuasaquëpi ju'ìma'ë ti pa'ìye paji. 48 Yè'ë a'ë, pan pa'ìye ìsiquë. 49 Mësaru aipë Maija'quë aonëre a'ahuë'ë, pan cuëne yeja cu'ì maca. Jaje aìsìcohua'ìta'a peo huë'ña juju sa'ahuë'ë. 50 Jaje pa'ìquëta'are yè'ë cato ma'tëmo cajesiquë panre cayë. Jare paipi aìsìcohua'ì pani ti ju'ìñe peoji. 51 Yè'ë a'ë, ja pan ma'tëmopi huajëquë

cajesiquë. Jã panre paipi aísicohua'i pani ti pani huesëye pa'iji. Yë'ë isija'a pan cato, yë'ë capë a'ë. Iye yeja pa'icohua'i pa'iyere caquë isija'quë a'ë.”

⁵²Jã maca jãre asani judío paipi sa'ñe coca cahuë, ñeje cajë:

“¿Me iquë maire i capë aosi'quë caquë'ni?”

⁵³Cajëna, Jesupi capi:

“Nuñerepa cayë, mësarute. Mësarupi Pai Mamaquë capëre aima'cohua'i pani cui'ne i tsiere ucuma'cohua'i pani ti pani huesëye peocohua'i pa'iyë. ⁵⁴Yë'ë capë aísiquëpi cui'ne yë'ë tsie ucusiquëpi ti pa'iyë paji. Jaje pa'ini yë'ëpi tãji mu'serepa ju'isiquëni huëoja'quë a'ë. ⁵⁵Jaje pa'ina, yë'ë capë cato nuñerepa aore pa'ë, cui'ne yë'ë tsie cato nuñerepa ucuyere pa'ë. ⁵⁶Yë'ë capë aísiquëpi cui'ne yë'ë tsie ucusiquëpi yë'ë ja're coní tsoni pa'iji. Pa'ina, yë'ëpi i ja're coní pa'iyë. ⁵⁷Yë'ëre jëjo daosiquë ja'quë cato pa'iyë paji, yë'ë ñni pacacaiyë. Jaje cui'ne, yë'ëre aiquëje yë'ë do'ire pasipi. ⁵⁸Ma'tëmopi cajesí pan ayere cayë. Iye cato ai tsoe Maija'quë Israel pa'ire aose'eje pa'ye peoji. Jã pan aísicohua'i si'a pai juju sa'ahuë'ë. Jaje pa'iquëta'are iye pan aísiquë cato ti pani huesëye pa'iji.”

⁵⁹Iye cato Jesús ye'yapi, Capernaum daripë pai tsi'si huë'ena.

Pa'i Cocarepa

⁶⁰Iye ye'yayere asani Jesure jai pai tuicohua'i acohua'ipi cahuë:

“Iye i caye jaje pa'ijë'ë cajë asa tì'añe peoji. Ai jerepa jëaji. ¿Jaje pa'ito nepi, asa tì'añe pa'iquë'ni?”

⁶¹Jã maca Jesús asapi, iohua'i sañope caye. Jaje pa'ina, seji'i, jaohua'ire:

“¿Yë'ë case'epi mësarute sañope caquë? ⁶²¿Me yo'o'ñe pa'iohua'i a'ni, Pai Mamaquëpi i ja'në pa'i sitona mëina, ñani? ⁶³Joyopi pa'iyë isiji, capë cato coçaima'coa. Yë'ë mësarute case'e cato nuñerepa joyo aye a'ë, ti pa'iyë isiye a'ë. ⁶⁴Jaje pa'iquëta'are mësaru acohua'i yecohua'i ja yë'ta'a nuñere pa'ë cajë asa títama'cohua'ipi pa'iyë.”

Jesús cato asapi, du'ru huëo macana iti cuasama'cohua'ire, cui'ne ite coso yehuoja'quëre. ⁶⁵Jaje pa'ina, capi:

“Mësarute cahuë. Ja'quëpi yë'ëna dacaíma'quë pa'ito yë'ë quë'ro telije dani tì'añe peoji.”

⁶⁶Jaje casi macapi jai pai Jesús ja're cu'icohua'i jeoni i ja're coní cui'iyë pahüë. ⁶⁷Jã maca Jesupi seji'i, i doce ye'yacohua'ire:

“¿Mësaruje jeoni saiye yëye?”

⁶⁸Caquëna, Simón Pedropi sehuopi:

“¿Ejaë, neina yëquë saija'cohua'i a'ni? Më'ë coca cato ti pani huesë coca'ë. ⁶⁹Yëquë cato më'ëre care paji cajë cuasahuë. Cui'ne asayë, më'ë cato Cristo api, Maija'quë huajëquërepa Mamaquëre papi.”

⁷⁰Caquëna, Jesupi sehuopi:

“Yë'ëpi mësaru doce pa'iohua'ire soihuë. Jaje pa'iquëta'are mësaru aquë te'i huati api.”

⁷¹Jaje cani Jesús Judas Iscarioteni capi, Simón mamaquëni, doce soisicohua'i aquëni, Judaspi ite coso yehuoja'quëni capi.

Jesús Yo'je Tsì Asacaiye Pahuë.

7 ¹Iye casi jeteyo'je Jesús Galilea yejare cunirojaji'i, Judea yeja pa'iyè coepi, judío paipi inì huani jeoñu'u cajè yo'o do'ire. ²Jaje pa'iquëta'are judío paì Egítopi etani a'ri huë'ña nejë pa'isi mu'sere cuasajè yo'o mu'seña ti'a huëopi. ³Ti'a huëoquëna, Jesús yo'je tsipi cahuë, ite:

“Iño pëama'è yure Judeana saijë'è, mè'ère tuicohua'ijè mè'è yo'oye ñaja'cohua'ire. ⁴Jaje pa'ina, si'a paì ñajajè cani yahue yo'ocojè ñani, mè'è yo'oyeje paì yo'o ti'a ma'ñere yo'ocohua'i. Paì yo'o ti'a ma'ñe yo'oquë sète si'a paì ñajëna, yo'o iñojè'è.”

⁵I yo'je tsì cato a'ri mañaje care paji cuasajè asama'cohua'ipi cahuë. ⁶Ja maca Jesupi capi:

“Ja yè'ta'a yè'è yo'o maca ti'añe paipi. Mësarute cato coa si'aè yo'oye de'oji. ⁷Mësarute cato iye yeja acohua'i coeye peoji. Jaje pa'iquëta'are yè'ère cato coeyè. Yè'èpi tiñarepa iohua'i yo'oye co'aye a'è caquë iño do'ire. ⁸Saijë'è, mësaruse'e fiestana. Yè'è cato saiye pañë. Ja yè'ta'a yè'è sai maca ti'añe paipi.”

⁹Jaje ca tëjini Galileana pëapi.

Jesupi A'ri Huë'ña Fiestare Pa'ise'e

¹⁰Paì tiñarepa ñañe peoye yahue Jesujè saji'i, fiestana, i yo'je tsì saisi jeteyo'je. ¹¹Fiesta pa'i maca judío paipi co'ejè cahuë:

“¿Jerore pare pa'iquë'ni, jaè?”

¹²Jai paì tsì'si sitopi Jesús ayere cahuë. Yecohua'ipi cahuë: “De'o paì api.” Cajëna, yecohua'ipi cahuë: “Co'acquë api. Coa paìre cosoquëna, asaquë api.”

¹³Jaje pa'iquëta'are tiñarepa caye pahuë, judío paìni ca'ra do'ire yahue carojaè'è. ¹⁴Fiesta joporepa pa'i maca Jesupi Maija'quë huë'ena cacani ye'ya huëopi. ¹⁵Ye'yaquëna, judío paipi ai ñajè cuasajè cahuë:

“¿Merepa iquë jaiye ta'ñe ye'yaquë'ni, toya ja'o ye'yema'quëta'a?”

¹⁶Cajëna, Jesupi sehuopi:

“Yè'è ye'yaye cato yè'è tse peoji. Ja cato yè'ère jëjo daosiquë tse a'è. ¹⁷Mësaruru aquëpi Maija'quë yëyere yo'oquë pani yè'è ye'yaye Diosu ye'yaye a'è caquë asaja'quë api. Panita'a coa ise'e cuasayere ye'yaji caquë asaja'quë api. ¹⁸Ise'e cuasayepi caquë cato paipi de'oquë api cajajè caquë caquë api. Jaje pa'iquëta'are ite jëjo daosiquëni paipi de'oquë api cacajajè caquë yo'oquëpi nuñerepa caji. Jaje pa'ina, ti cosoma'quëpi caji.

¹⁹Mësarute Moiséspi cuañese'e isipi. Isiquëta'are mësarupi sehuocaiye pañë, ja cuañese'e. ¿Me yo'ojè yè'ère huani jeoñe yëye'ni?”

²⁰Caquëna, paipi sehuohuë:

“Huati joyore hue'equë, mè'è. Jaje cayë, mè'è, ¿nepi mè'ère huani jeoñe yëye'ni?”

21 Cajëna, Jesupi sehuopi:

“Huajë mu'se pa'ina, te'ore yo'ose'ere ñani mësarü ai cuasayë. 22 Mësarü aipë tsoe du'ru yo'oyere Moisés cato cuañepi cui'ri ca'ni tëaye paji'i caquë. Ipi huëoye papi, ja cato. Jaje pa'ina, mësarü huajë mu'se pa'itoje cui'ri ca'ni tëacohua'i a'ë, tsire. 23 Najë'ë. Yure, mësarupi Moisés cuañese'e yo'o tì'añu'u cajë huajë mu'se pa'itoje tsire cui'ri ca'ni tëacohua'ita'a, ¿me yo'ojë mësarü yë'ëre pëñe'ni, ju'iquë macare huajë mu'se pa'ina, jujucaisi do'ire cajë? 24 Co'aye yo'oyeje pa'ye ña cuañone co'aji cama'pë pa'ijë'ë. Co'aye yo'oji cacohua'i pani nuñerepa co'ayere ñani cajë'ë.”

Jesús I Dai Sitore Quëaye

25 Ja maca Jerusalén pa'icohua'i acohua'ipi sa'ñe se huëoreña:

“¿Jaëje pa'ini, pa'i huani jeoñu'u cajë co'ejëna, mai ñasicohua'ita'a? 26 Yure ipi si'aohua'i ñajëna, caquëta'are te'ijë ite sañope caye paji. ¿Ejaohua'ipi iohua'ita'a nuñerepa Cristore papi caji cajë cuasa do'ire sañope caye pañë? 27 Jaje pa'iquëta'are mai cato asayë, i huëo sito.”

28 Iyere Jesús asani, Maija'quë huë'e ye'yaquëpi ai tutu, capi, ñeje:

“Jaje pa'ito mësarü asayë, yë'ë dai sito cui'ne yë'ëreje ñacohua'i a'ë. Yë'ë cato nuñerepa pa'ipi jëjo daosiquë a'ë, mësaruje ñama'quëpi. 29 Yë'ë cato ite ñaquë a'ë, i quë'ropi daisiquë sëte. Ipi yë'ëre jëjo daopi.”

30 Ja maca ite tseañu'u cajë yo'ojëta'a te'ijë ite tome dani tseañe pañuë, ja yë'ta'a ite tseña maca tì'añe pa'si do'ire. 31 Jai pa'i Jesure ire papi cuasajë asahuë. Jaje pa'ina, cahuë:

“Cristopi daisiquë pani, iquë yo'ose'e seña maca pa'i yo'o tì'a ma'ñere yo'oye iñoñe peoji, cuasayë.”

Jesure Tseajë'ë Cajë Fariseo Pa'i Soldado Paire Jëjo Saose'e

32 Fariseo pa'ipi asahuë, Jesús ayere pa'ipi cajëna. Jaje asani jaohua'i cui'ne Maija'quë huë'e ñacacohua'i ëjaohua'i conì co'aye yo'ocohua'ire tsesecohua'ire jëjo daohuë, tseani Jesure sa'ajë cajë. 33 Ja maca Jesupi capi, ite tseña dasicohua'ire:

“Yures'e mësarü ja're conì a'ri maña pa'si'i. Ja jeteyo'je yë'ëre jëjo daosiquë quë'rona co'isi'i. 34 Mësarü yë'ëre co'ejëta'a tì'añe paja'cohua'i a'ë, yë'ë sai sito sani tì'añe peo do'ire.”

35 Ja maca judío pa'ipi iohua'ija'a sa'ñe seteña, ñeje cajë:

“¿Jerona sani huesësi'quë caquë'ni, iquë, mai tì'añe peo huë'ñarepa? ¿Judío pa'ipi griego paina co'me huesëni pa'icohua'ina sani griego paini ye'yaja'quëpi caquë? 36 ¿Me caquë yë'ëre co'ejä'cohua'i a'ë, co'ejëta'a tì'añe paja'cohua'i a'ë, yë'ë pa'i huë'ña sani tì'añe peo do'ire caë'ni, maire?”

Pa'iyë Isi Ocorepa

37 Fiesta tëji mu'serepa cato ai ëja mu'serepa pa'iji. Pa'i maca Jesupi huëni nëcani ai tutu capi, ñeje:

“Oco ëa ju'iquë pani daijë'ë, yë'ëna. Dani ucujë'ë. ³⁸Toya pëpë cayeje yë'ëre sehuoquëre cato joyopi pa'i ocorepa etaquëna, pasipi, tsiayaje pa'i.”

³⁹Jaje cani Jesús capi, ite ire papi cajë cuasacohua'ipi Maija'quë de'oyoyore ti'aja'cohua'i a'ë caquë. Ja maca cato ja yë'ta'a Maija'quë de'oyoyoy daiye papi, Jesupi ja yë'ta'a ma'tëmona colima'ëna.

Te'e Cuasaye Paçohua'i

⁴⁰Paï jopo pa'icohua'ipi jaje cayere asani careña:

“Iquë cato nuñerepa Maija'quëre quëcaiquë api. Iti daija'quë api casiquë api.”

⁴¹Cajëna, yecohua'ipi careña:

“Iquë cato Cristo api.”

Jaje cajëta'are yecohua'ipi cahuë:

“¿Me Cristo pa'iquë'ni, Galilea yeja aquë? ⁴²Toyase'e cato caji, Cristo cato paï ëjaërepa David tsëcapë aquë pa'ija'quë api. Belén daripë aquë pa'ija'quë api. David pa'isi daripë aquë pasipi.”

⁴³Jaje pa'ina, Jesús do'ire yo'ojë cajë paipi huahue sahuë, yequë tsëca de'ojë. ⁴⁴Yecohua'ipi tseani sañu'u cajëta'a tseañe pahuë.

Paï Ëjaohua'i Jesure Sehuocaiye Pase'e

⁴⁵Jesure tsesehua'ipi col'ihuë, Maija'quë huë'e ñacaicohua'iquë'rona, cui'ne fariseo paï cui'ne Maija'quë huë'e ñacaicohua'iquë'rona. Col'irena, jaohua'ipi se'i'ë:

“¿Me yo'ojë tseani daye pare'ni?”

⁴⁶Cajëna, paire tsesecohua'ipi sehuojë cahuë:

“¿Ai de'oyerepa yecohua'ijë jaë cayeje cacohua'iti ti peoyë'!”

⁴⁷Ja maca fariseo paipi cahuë:

“¿Mësarujë i cosoyere sehuore? ⁴⁸Yëquë ëjaohua'ijë i caye asaye pahuë. Cui'ne fariseo ëjaohua'ijë ite asacaiye pahuë. ⁴⁹Jaje pa'iquëta'are cuañese'le caye asama'cohua'ipi co'acohua'ipi sehuocaiyë, ne huesëja'cohua'ipi.”

⁵⁰Nicodemo fariseo aquëpi ñami sani Jesure ñasiquëpi capi, jaohua'ire:

⁵¹“Mai cuañese'ejë pa'ye yo'oni, jaëte huani jëoñe peoji, ja yë'ta'a i yo'ose'ere asama'pë pani.”

⁵²Jaje caquëna, ja maca sehuoreña:

“¿Më'ëje Galilea aquë aë? De'hua toyase'ere ye'yejë'ë, Jare më'ë ye'yenita'la Galileapi, Maija'quëre quëcaiquë te'ijë daiye pase'e, asaye pa'iji.”

⁵³Ja maca paï ñape iohua'ihuë'ñase'ena sani sahuë.

Ëmë Yo'oco Ayere Quëaye

8 ¹Jesupi Olivos cutihuëna saji'i. ²Ñatasi mu'se nea huë'ña Maija'quë huë'ena col'ipi. Si'a paï i quë'rona tsio daë'ë. Datena, ja'runi ñu'i ye'ya huëopi. ³Ja maca cuañese'le ye'yacohua'ipi cui'ne fariseo paipi

ëmère yo'ocona, ti'asiconi dahuë. Dani iti maca pa'icohua'i jopona nëconi.

⁴Jesure cahuë:

“Ye'yaquë, iye nomiore yëquë dahuë, ëmère yo'ocona, ti'asiconi.

⁵Moisés cuañese'epi maire cuañeji ñeje yo'o nomiohua'ire quëna pëapi jëa jo'a hueajë'ë, caquë. ¿Jaje pa'ito më'ë me caquë'ni?”

⁶Iye cato cahuë, neñañu'u cajë. Ca tayouna, sañope cayere cajë cahuë. Ja maca Jesús meñe në meni moñopi yejana toyapi. ⁷Jaje yo'oquëna, jaohua'i cato ja yë'ta'a sejë nëcahuë. Ja maca yureta'a nuñerepa nëcaquë capi, jaohua'ire:

“Mësaru aquëpi ti tayo co'aye yo'oma'quëpi quëna pë ñi ñona jëo huëojaquë.”

⁸Jaje cani cui'naëpi në me conì yejana toyapi. ⁹Jare asani, ai cuasajë te'o hua'ise'e etajë saë'ë. Aiohua'ipi eta huëoni si'a paì etahuë. Si'a paì sani saisi maca Jesuse'e pëapi, nomio ja're conì. ¹⁰Ja maca Jesús nuiñe nëcani paìje peojëna, ñani nomiose'e pa'iona, capi:

“¿Nomio jerore pa'iyë'ni, më'ère sañope casicohua'i? ¿Te'ijë më'ère nejoñe paë?”

¹¹Caquëna, jopi cao:

“Pahuë, sañope yo'oye, Èjaë.”

Cacona, ja maca Jesupi capi:

“Yë'ëje më'ère sañope caye pañë. Yurepi sani cui'naopi co'aye yo'o coñe pajë'ë.”

Jesu Api, Paire Miacaiye

¹²Tijupë Jesús paire caquë capi:

“Yë'ë a'ë, iye yeja miacaiquë. Yë'ère pe'tequë cato miañere pasipi, pa'iyë isiyere. Jaje pa'i nea hue'ñare cu'iyë pasipi.”

¹³Caquëna, ja maca fariseo paipi cahuë:

“Më'ëja'a co'ye de'loquë a'ë caquë quëayë, më'ë. Jaje quëaye cato co'aji.”

¹⁴Cajëna, Jesupi capi:

“Yë'ë quëaye cato do'i quë'ye a'ë, yë'ëpi yë'ëja'a co'ye caquë quëatoje. Yë'ë cato asayë, yë'ë dai sito cui'ne yë'ë saija'to. Jaje pa'iquëta'are mësaru cato huesyë, yë'ë dai sito cui'ne yë'ë saija'to. ¹⁵Mësaru cato iye yeja paì co'aji cayepi cacohua'i a'ë. Yë'ë cato te'ireje co'aji, cama'quë a'ë. ¹⁶Jaje pa'iquëta'are yë'ëpi co'aji cani yë'ëse'e caye pañë. Yë'ë ja'quë yë'ère jëjo daosiquëpi yë'ë ja're conì caquëna, cayë. Yë'ë caye cato nuñere pa'ë.

¹⁷Mësaru cuañese'e cato caji cayahua'i cui'ne te'ejë pa'ye cato asaye pa'iji, care payë cajë. ¹⁸Jaje pa'iyë sète yë'ëja'a co'ye quëacaiquë pa'iyë. Yë'ë ja'quë yë'ère jëjo daosiquëje yë'ère quëacaiquë api.”

¹⁹Caquëna, ja maca setëña:

“¿Jerore pa'iquë'ni, më'ë ja'quë?”

Cajëna, Jesupi sehuopi:

“Mësaru yë'ère ña ti'añe pañë. Pajë cui'ne ja'quëreje ña ti'añe pañë. Yë'ère ña ti'acohua'i pani, ja'quëreje ña ti'añe patira'pi.” ²⁰Iye cato Jesús capi, ja yë'ta'a

Maija'quë huè'ere pa'i ye'ya maca. Maija'quëna curi isi mahuëa què'ropi nëcaquë case'e a'ë. Jaje catoje ite tseañe pahuë, ja yè'ta'a ite tsea maca ti'ñañe pase'e sète.

Yè'ë Sai Huë'ña Mësaruru Sani Ti'ñañe Peoji, Case'e

21 Cui'naëpi Jesús ca cöpi:

“Yè'ë saiye. Saquëna, mësaruru co'ēja'cohua'i a'ë. Jaje co'ejëta'a jare mësaruru tayo co'aye yo'oyena ju'ija'cohua'i a'ë. Jaje pa'ina, yè'ë sai huë'ña, mësaruru saiye paja'cohua'i a'ë.”

22 Ja maca judío paipi cahuë:

“¿Co'ye huani jusi'quë caquë. Jaje yo'ouna, i què'ro ti'ñañe paja'cohua'i a'ni?”

23 Cajëna, ja maca Jesupi capi, jaohua'ire:

“Mësaruru cato ino huè'ehuë acohua'i a'ë. Yè'ë cato jeto ëmë aquë a'ë. Mësaruru cato iye yeja acohua'i a'ë. Yè'ë cato iye yeja aquë peoyë. 24 Jaje pa'ina, cahuë, mësaruru tayo co'aye yo'oyena ju'ija'cohua'i a'ë, yè'ëni ire papi cajë cuasama'cohua'i pani. Jaje mësaruru tayoyena ju'ija'cohua'i a'ë.”

25 Ja maca setëña:

“¿Iquei'ni, më'ë?”

Cajëna, Jesupi sehuopi:

“Tsoe mësarute ja'a huëo maca cahuë. 26 Jaiye mësaruru tayoyere caye pa'iquëta'are pañë. Yè'ëre jëjo daosiquëpi nuñerepa caji, ti tayoyere peoyerepa. Jaje pa'ina, yè'ë iye yeja paire caye cato i caquëna, asase'ere cayë.”

27 Jaje caquëna, jaohua'ipi, Maija'quë ayere caji cajë asaye pahuë. 28 Jaje pa'i do'ire capi:

“Mësarupi yè'ëre ëmëje'na huëo nëcosi maca Pai Mamaquëre ire papi cajë ñaja'cohua'i a'ë. Ja maca yureta'a coa isi yo'oye papi cajë ñaja'cohua'i a'ë. Jaje pa'ina, yè'ë cato ja'quë ye'yase'ere cayë, mësarute. 29 Yè'ëre jëjo daosiquë cato yè'ë ja're coní pa'iji, yè'ë ja'quë yè'ëre te'ire jeoñe papi. Jaje pa'ina, yè'ë cato si'anë i yëyere yo'oyë.”

30 Jaje Jesús iyere caëna, jai pai ite ire papi cajë cuasare pahuë.

Maija'quë Mamajërepa Cui'ne Tayo Yo'oyepi Jo'yaohua'ire Paye

31 Ja maca Jesús capi, judío paipi ite ire papi cajë cuasasicohua'ire:

“Mësarupi yè'ë nuñerepa case'ere tayo saima'pë pa'ini, ja macata'a nuñerepa yè'ëre ye'yecohua'i pa'iyë. 32 Jaje pa'ijë nuñerepa pa'iyere ñaja'cohua'i a'ë. Najëna, nuñerepa pa'iyepi mësarute jo'yaohua'i peocohua'ire neñe pa'iji, joye huasoyeje pa'ye.”

33 Jaje caquëna, jaohua'ipi sehuohué:

“Yè'ëquë cato Abraham tsëcapë acohua'i a'ë, cui'ne ti yecohua'i jo'ya pa'ima'cohua'i a'ë. ¿Me yo'oquë më'ë, jo'ya tsëasicohua'i peojë de'oye pa'ija'cohua'i a'ë, caquë'ni?”

34 Cajëna, Jesupi capi:

“Si'aohua'i tayo co'aye yo'ocohua'i cato tayo co'aye yo'oyepi jo'yaohua'ire paquëna, pa'iyë. ³⁵Si'anë ìti tsëcapë ja're pa'iquë api. Mamaquë cato jaje pa'iquëta'are jo'yaë cato coa çoni pa'iquë api, ìti tsëcapë aquë peoquëpi, ti pa'iyë peopi. ³⁶Jaje pa'ina, mësaru ì Mamaquëre papi jo'yaohua'i pa'iyere nejocaquëna, ja maca yureta'a nuñerepa jo'yaohua'i peoye pa'ija'cohua'i a'ë. ³⁷Tsoe asayë, mësaru Abraham tsëcapë acohua'i pa'iyë. Jaje pa'iohua'ita'a yë'ëre huani jëoñe yëyë, yë'ë cayere asaye coe do'ire. ³⁸Yë'ë ja'quë ìnose'ere cayë, mësarute. Caquëna, mësarupi mësaru ja'quë case'ere yo'oyë.”

³⁹Caquëna, ìohua'ipi cahuë, ìte:

“Abraham cato yëquë ja'quë api.”

Cajëna, Jesupi capi:

“Mësarupi nuñerepa Abraham mamajë pani ì yo'ose'eje cui'ne yo'ora'huë. ⁴⁰Tsoe mësarute nuñerepa Diusu ye'yase'ere cahuë. Jaje pa'iquëta'are yë'ëre huani jëoñe yëyë, mësaru. ¡Abraham jaje yo'oye ti papi! ⁴¹Mësaru cato mësaru ja'quë yo'oyepi yo'oyë.”

Caquëna, ja maca ìohua'ipi cahuë:

“Yëquë cato coa huero mamajë peoyë. Te'ire ja'quëre payë. Jaë cato Diusupi.”

⁴²Cajëna, ja maca Jesupi capi:

“Nuñerepa mësaru Ja'quëpi Diusu pa'ito mësaru yë'ëre otira'huë. Yë'ë cato Diusu quë'ropi daisiquë a'ë. Daisiquëpi ìnore pa'iyë. Yë'ëse'e daisiquë peoyë. Diusupi jëjo daosiquë a'ë. ⁴³¿Me yo'ojë mësaru, yë'ë cayë asa ti'añe pañe'ni? Mësarupi asaye coe do'ire pañë. ⁴⁴Mësaru ja'quë cato huati api. Mësaru ì tsëcohua'i a'ë. Jaje pa'ina, ì yëyere yo'oye yëyë. Huati cato huani jëoquë api. Jare jaje pa'i api, tsoeje, ti nuñerepa yo'oma'quë api, cui'ne ti nuñerepa cama'quë api. Coa cosoyere cani, jaje ì ayere caji, coa cosou sëte, coa cosoye pëca ja'quë sëte. ⁴⁵Jaje pa'ina, yë'ë nuñere pare caquëni, mësaru asacaiye coeyë. ⁴⁶¿Nepi mësaru acohua'i, yë'ëre më'ë tayoyë cajë ìñoja'cohua'i a'ni? Nuñerepa yë'ë caquëre, ¿me yo'ojë mësaru care paji cajë asacaiye pañe'ni? ⁴⁷Diusu te'te aquëpi, Maija'quë coca asaye pa'iji. Jaje pa'iquëta'are mësaru cato Diusu acohua'i peoyë. Jaje pa'ina, asaye coeyë, yë'ë caye.”

Cristo Cato Abraham Jerepa Tsoe Aquë Api

⁴⁸Ja maca judío paipi cahuë:

“Nuñere pajë më'ëre jaje caquë'ni, Samaritanopi cui'ne co'a joyore hue'equë api cayë, yëquë.”

⁴⁹Cajëna, Jesupi sehuopi:

“Co'a joyore ti peoquë a'ë. Yë'ë cato ja'quëni de'oquëre papi cacaiyë. Ja do'ire mësaru cato yë'ëre co'aquë api, cayë. ⁵⁰Yë'ëre de'oye cacaijë'ë caquë oima'ë pa'iyë. Yë'ëre de'oye cacaiquë pa'iji. Jaë api, ìti yo'ose'e pa'iyëje caquërepa. ⁵¹Nuñerepa cayë, yë'ë caye asani yë'ë cayeje yo'oquë cato ti ju'iñe paja'quë api.”

⁵²Ja maca judío paipi sehuohuë:

“Yureta'a asare pahuë, më'ë nuñerepa co'a joyore hue'equërepa pa'iyë. Abraham cui'ne Maija'quëre quëacaicohua'i tsoe acohua'ijë jūni huesëa'huë'ë. Jajë pa'iquëta'are më'ëpi cayë 'yë'ë caye asani, yë'ë cayeje yo'oquë cato ti ju'ĩne paja'quë api.’⁵³ Yëquë ja'quë cato Abraham. ¿Më'ëpi seña maca pa'i a'ë cusaquë, më'ë? Abraham cui'ne Maija'quëre quëacaicohua'i juju sa'ahuë'ë. ¿Iquei a'ë cusaquë më'ë caquë'ni, jajë?”

⁵⁴ Cajëna, Jesupi sehuopi:

“Yë'ëja'a co'ye de'oye yo'oyë caquë pa'ito yë'ë de'oye yo'oyë caye ti coçaiye paji. Jajë pa'iquëta'are mësarū yëquë ja'quë api caquëpi yë'ëre de'oye yo'oji cacaiji yë'ë ja'quëpi. ⁵⁵ Jajë pa'iquëta'are mësarū ña ti'ama'pë pa'iyë. Yë'ëta'a ite ñaquë a'ë. Jajë ñaquëta'a yë'ëpi ñama'quë a'ë caquë pani coa cosourepa pa'iyë pa'iji mësarujë pa'i. Jajë pa'iquëta'are yë'ë cato nuñerepa ñaquë a'ë. Jajë pa'ina, i caye sehuocai yo'oyë. ⁵⁶ Abraham mësarū aipi sihua'ajji'i, yë'ë mu'señare ñaja'quë a'ë caquë. Ñani sihua huajë'ajji'i.”

⁵⁷ Ja maca judío pai Jesure cahuë:

“Ti cincuenta ometëcajë peoquëpi ¿Abrahamre ña'ahuë'ë cayë, më'ë?”

⁵⁸ Cajëna, Jesupi capi:

“Nuñerepa mësarute cayë. Yë'ë cato Abraham pa'ima'në ai jerepa tsoe aquë a'ë.”

⁵⁹ Caëna, ja maca quëna pëapi imani jeañu'u Jesuna cajë yo'ohuë. Yo'ojëna, catipi. Catini Maija'quë huë'epi iohua'i jopoja'a sa etani saji'i.

Tsi'nëna Ñama'quëni Jesús Jujuse'e

9 ¹ Pai pa'i hue'ñaja'a sai Jesús ñapi, tsi'nëna ñaco ça porei ai de'osiquëre. ² Jajë pa'ina, ñani i ye'yacohua'ipi se'i'ë, Jesure:

“¿Me yo'oquë ñaco ça porei ai de'ou'ni, jajë? Pëca ja'quëohua'i tayo do'ire co'aye ai de'ou, panita'a çu do'i a'ni?”

³ Cajëna, Jesupi capi:

“I tayo do'ijë peoji. Cui'ne pëca ja'quëohua'ijë tayo do'ijë peoji. Iquë cato ite juju maca Maija'quë yo'oye paire iñoja'quëpi ai deosiquë api. ⁴ Ja yë'ta'a mu'se pa'inë yë'ëre jëjo daosiquë co'amaña yo'oye pa'iji. Ñami de'o huëoji. Ñami cato co'amaña neñe peoji. ⁵ Yë'ë ja yë'ta'a iye yejare pa'ini yë'ë a'ë, miacaiquë iye yeja pa'icohua'ire.”

⁶ Iye se ca tējini Jesús yejana copi neni ya'ore a'ji sēpē neni ñama'quë ñaco çana ya'opi nepi. ⁷ Ja maca capi:

“Siloé oco dea pëna sani tsoa toj'ë. Siloé cani cayë, jëjo daosiquë.”

Jajë caëna, ñama'quëpi sani tsoa tōni tsoe ñaquëpi daji'i, i quë'ro. ⁸ Ja maca ja'në ñama'quë pa'ina, ñasicohua'ipi cui'ne i quëno maca pa'icohua'ipi cahuë:

“¿Iquë mai ñajëna, curi sei ñu'isiquë pa'ima'quë aë?”

⁹ Cajëna, yecohua'ipi cahuë:

“Jajë pa'ijë'ë. I api.”

Yecohua'ipi cahuë:

“Jare ije pa'ita'a yequë api.”

Jaje cajëna, ipi capi:

“Yë'ë ì a'ë.”

¹⁰Ca maca ìte seteña:

“¿Me më'ë yure neni ñaquë pa'iquë'ni?”

¹¹Cajëna, ipi sehuopi:

“Jaë Jesús hue'equëpi yë'ëre ya'opi a'jiñe neni ñaco cãna je'napi. Jaje yo'onì capi: ‘Siloé oco dea pëna sani tsoajë'ë.’ Caëna, sani tsoa tō maca tsoe ñaquë paë'ë.”

¹²Jaje caquëna, ìte sei'ë:

“¿Jerore pa'iquë'ni?”

Cajëna, ipi capi:

“Huesëyë.”

Fariseo Paipi Ñaco Porei Pa'isiquëni Seni Asase'e

¹³Ja maca fariseo paì quë'rona ñaco cã porei pa'isiquëre sahuë. ¹⁴Jesús ya'opi neni ñaco cã poreire jujusi mu'se cato huajë mu'se paji'i. ¹⁵Jaje pa'isi do'ire, fariseo paipi asani ñama'quë pa'isiquëre seni cõhuë. Me më'ë yure neni ñaquë'ni cajë. Cajëna, ipi capi:

“Ya'opi a'jiñe neni yë'ëre ñaco cãna je'naëna, sani tsoa tōni yure ñaquë pa'iyë.”

¹⁶Ja maca fariseo acohua'i cahuë:

“Iye yo'osiquë cato Diusu te'te peoquëpi jaje yo'opi, huajë mu'se a'ë caye peoye.”

Jaje, cajëna, yecohua'ipi cahuë:

“¿Me co'aquë pani ñeje, paì yo'o tì'a ma'ñere de'oye yo'oquë'ni, ì?”

Jaje yo'ojë cajë yequë tsëcapëa huayequë paji'i, sa'ñe ca do'ire. ¹⁷Tijupë seni cõhuë, ja'rë ñama'quë pa'isiquëre ñeje cajë:

“¿Më'ë iqueipi caquë'ni, më'ëre ñañe necaisiquëre?”

Cajëna, ipi sehuopi:

“Yë'ë cato cayë, Maija'quëre quëacaiquë api.”

¹⁸Jaje caquëta'are judío paipi nuñerepa ñama'quë pa'isiquëpi ñaji cajë asaye pahuë. Coa caji cajë, ì pëca ja'quëohua'ireje soihuë, ja do'ire. ¹⁹Soini sei'ë:

“¿Mësarù mamaquë aë, iquë ñaco cã porei ai de'osiquë? ¿Yure jaje pa'ita'a me yo'oquë ñaquë'ni?”

²⁰Cajëna, ì pëca ja'quëohua'ipi sehuohuë:

“Yëquë mamaquë api. Cui'ne ìte cõa macana ñama'quë. Ai de'osiquë api asayë, yëquëpi ja cato. ²¹Jaje pa'iquëta'are yure cato huesëyë, me yo'oquë ñaquë ponë'ni cajë ìte ñañe necaisiquëreje huesëyë. Ìni seni asajë'ë. Tsoe ai api, ipi quëajaquë ja do'ire ñaquë pa'iyë, caquë.”

²²Ñama'quë pëca ja'quëohua'i cato coa judío paini ca'rajë jaje cahuë. Si'ahua'ire Jesure Cristo api cacohua'ire paì tsi'si hue'ñapi eto saoye pa'iji

cajè cui'ñase'ere asajè. ²³Jà do'ire ì pèca ja'quèohua'ipi cahuè: “Ìni senì asajè'è. Tsoe ai api.”

²⁴Jà maca judío pai ñama'què pa'isiquère soi çoreña. Daquèna, cahuè: “Nuñerepa quèajè'è, Diusu ña hue'ñare pana. Yèquè asayè, mè'ère jujusiquère tayo yo'oquè api cajè.”

²⁵Cajèna, ìpi sehuopi:

“Yè'è cato huesèyè, tayo yo'oquè api caye cui'ne paquère papi cayeje. Yè'è ta'ñe asaye cato iyese'e pa'iji, ja'rè ñama'què pa'isiquèpi yure ñaquè pa'iyè.”

²⁶Tijupè seteña:

“¿Me mè'ère nei'ni? ¿Mè'ère me yo'oni ñaquère nei'ni?”

²⁷Cajèna, sehuopi:

“Tsoe quèahuè, mèsarute. Quèatoje asa yèma'pè pa'iyè. Yè'è caye: ¿Iquere cajè cui'nare ca cojè'è cajè se'ñe'ni? ¿Ìni tuñu'u cajè yèjè se'ñe?”

²⁸Caquèna, ja maca ìte ai tea junì tējini capi:

“Mè'èpi ìni tuina nēiji, yèquè cato Moisésre tuicohua'i a'è cahuè. ²⁹Yèquè asayè, Moisésre Diusupi case'e. Ja'ère cato huesèyè, ì pa'i hue'ñaje.”

³⁰Cajèna, ìpi capi:

“¡Merepa yo'ojè mèsaru huesèye'ni, ai ye'yesicohua'ita'a, ì dai sito, yè'ère ñaco ca jujucaisiquère! ³¹Maipi asayè, tayo yo'ocohua'ire Diusu asacaiye paji. Ìte sihuacohua'ire cui'ne ì yèye yo'ocohua'ise'ere asacaiquè api, Diusu. ³²Tsoeje ti asama'cohua'i a'è, tsihua'è pa'inè ñama'què ai de'osiquèni ñaquère necaise'e. ³³Iquèpi Diusu què'ropi daima'què pani ti jaje yo'oyeje para'pi.”

³⁴Caquèna, ja maca ìohua'ipi cahuè:

“¿Tayo yo'oye timèsiquèpi ai de'osiquè api, mè'è yèquère ye'yasi'i caquè?”
Jaje canì ìte pai tsi'si hue'ñapi eto saohuè.

Joyo Ñañere Ñama'cohua'i Pa'iyè

³⁵Jesús tsoe asapi, ñama'què pa'isiquèpi ñaquè pa'ina, judío paipi eto saose'e. Jesupi ìte ti'ani capi:

“¿Diusu mamaquère mè'è ìre papi cuasaquè pa'iquè?”

³⁶Caquèna, ìpi capi:

“Èjaè, quèajè'è, yè'ère. Jequè a'ni, yè'èje ìte jaè api caquè cuasaquè pa'ija'quère.”

³⁷Caquèna, Jesupi sehuopi:

“Tsoe mè'è ñahuè. Yè'è ì a'è. Ì ja're mè'è coca cayè.”

³⁸Jà maca Jesús yè'què macana do're ja'runi capi:

“Ìre papi caquè cuasayè, Èjaè, mè'ère.”

³⁹Jà jeteyo'je capi, Jesús:

“Yè'è cato iye yejana da'è, nuñerepa yo'oyepi pa'ijaquè caquè. Ñama'cohua'i pa'isicohua'ipi ñajajè caquè, cui'ne ñacohua'i pa'isicohua'ipi joyopi ñama'cohua'i pa'ijajè caquè.”

40Ja maca fariseo paipi i ja're coní pa'isicohua'ipi iyere asani sei'è:
 “¿Yèquèje mè'è ñato ñaco ca peocohua'i a'ni?”

41Cajèna, Jesupi sehuopi:

“Mèsarupi ñama'cohua'i pani mèsaru tayo yo'o do'ire jai do'i peocohua'i patira'huè. Jaje pa'iquèta'are mèsarupi ñacohua'i a'è caye sète do'i què'iohua'i pa'iyè.

Yèi Ñama Tu'rihuè Ayere Ye'yaye

10 1Nuñerepa mèsarute cayè, yèi ñama eta sa'roja'a tu'rihuèna cacama'què pani, ñaèpi cui'ne co'aquèpi eta sa'ro peo hue'ñaja'a cacaquè cato. 2Jaje pa'iquèta'are yèi ñama eta sa'roja'a cacaquè cato yèi ñamare ñacaiquè api. 3Eta sa'ro hui'yocaiquèje de'oye hui'yocaiji, cacajaquè caquè. Cui'ne yèi ñamaje asayè, i yè'o. Iohua'i mamire caquè soiji, yèi ñamare. Cui'ne tu'rihuè nèicohua'ini hue'sena etoji. 4Etoni sai saji, ipi du'ru sai. Yèi ñamaje asayè, i yè'o. Jaje asajè tuiyè, ite. 5Jaje tuicohua'ita'a yequèpi soiquè pa'lito asani coa catiyè, ñama'quère sète yequè yè'o caquèna, asajè.”

6Ñeje yo'oyè, paí caquè iñoquèta'are paipi asa ti'añe pahuè, Jesús caye.

Jesús De'o Ñacaiquè

7Ja maca Jesús tijupè ca cõpi:

“Nuñerepa mèsarute cayè. Yè'è a'è, eta sa'ro yèi ñama caca sa'ro. 8Ja yè'ta'a yè'è daima'nè daisicohua'i cato ñaohua'i a'è cui'ne co'acohua'i a'è. Jaje pa'iquèta'are yèi ñamapi asaye pahuè, iohua'i cayere. 9Yè'è a'è, eta sa'ro. Yè'èja'a cacasiquè cato huaso cuañosiquè pa'lja'què api. Jaje pa'i etasiquèpi cui'ne cacasiquèpi i yèyeje yo'oquè pa'lja'què api, cui'ne de'o aore ti'aja'què api.

10Naè cato coa yahue ìmañe caquè cacaquè api, huani jeosi'i caquè, cui'ne nejosi'i caquè. Yè'è cato yèi ñamapi pa'iyere pajajè caquè daisiquè a'è, ti pa'iyere jaiye pajajè caquè. 11Yè'è cato de'oye yèi ñamare ñacaiquè a'è. De'oye ñacaiquèpi yèi ñamapi pa'ljjajè ise'e caquè i pa'iyere isiquè api. 12Coa sai do'ire necaiquè cato lobopi daina, ñani yèi ñamare ñacaiye jeoni catiquè api, yèi ñamare ñacaima'què sète, cui'ne yèi ñamaje tìohua'ire sète jaje yo'oji. Yo'ouna, ja maca lobopi dani tseani yo'oquè tiya huesoquè api cui'na hue'ña. 13Catiquè cato sai do'ire yo'oquè api. Jaje pa'ina, oi èayeje ti peoji, ite yèi ñamare.

14-15Yè'è a'è, de'oyerepa yèi ñamare ñacaiquè yè'ère ja'què ñaquè pa'iyeye, yè'èje ite ja'quère ñaquè pa'iyè. Jaje cui'ne yè'è yèi ñamareje ñaquè payè. Naquèna, iohua'lje yè'ère ñañè. Yè'èpi yè'è pa'iyere yèi ñama do'ire isiyè. 16Payè, cui'ne yequè yèi ñamareje. Yequè tu'rihuè acohua'ire jaohua'ireje iñona daye pa'lji, yè'ère. Jaohua'lje yè'è caye sehuocaija'cohua'i a'è. Ja maca cui'ne te'e tsècapè pa'lja'cohua'i a'è, cui'ne te'i yèi ñamare ñacaiquè pa'lja'què api.

17Ja'què yè'ère yèji, yè'è pa'iyere isisiquèpi cui'naèpi yè'è pa'iyè pa coja'quèpi yo'oquèna. 18Yè'è pa'iyè jioquè peoji. Yè'è yèyepi isiyè, yè'è pa'iyè. Yè'è jaje neñe pa'lji cui'ne cui'nare pa coñeje de'oji. Iye a'è, yè'è Ja'què yè'ère cuañese'e.”

¹⁹Iyere judío p̄ai asani cui'naohua'ipi hua cohüë, t̄i tsëcapëa. ²⁰Jai p̄ai iohua'i acohua'ipi cahuë:

“¿Me neñu'ju i caye asani sheuocaiye'ni, care paji cajë co'a joyore hue'equëpi cui'ne coa cuepequë caquëre?”

²¹Cajëna, yecohua'ipi cahuë:

“Co'a joyore hue'equëpi jaje ca t̄i'añe peoji. ¿Co'a joyopi ñama'quëre ñaquëre necaiye pa'iquë? Cui'ne ti peoji.”

Judío P̄ai Co'aquë Api Caye Jesure

²²J̄a mu'seña cato oco tëcahuë paji'i. Pa'ina, Jerusalén cato Maija'quë huë'e ne ja'ñere cuasajë sihuajë jai p̄ai tsi'sini yo'o maca t̄i'api. ²³Jesús cato Maija'quë huë'e sa'nahuëre cunirojaji'i, Salomón hue'yosi hue'ña.

²⁴J̄a maca judío p̄ai Jesure tsi'sini cahuë:

“¿Yëquëre më'ë je yëhua nuñerepa quëaja'quëpi huesë äyae caquë pa'iquë'ni? Më'ëpi nuñerepa Cristo pani quëare pajë'ë, te'e nuñerepa.”

²⁵Cajëna, Jesupi capi:

“Tsoe mësarute cahuë. Caquëta'are mësarupi care paji cajë asaye p̄ahuë. Yë'ë ja'quë cuañesi tutupi yo'oyë. J̄a yo'oyepi tiñarepa iñoji, mësarute. ²⁶Jaje pa'iquëta'are mësarupi nuñere pa'ë cajë asaye pañë, yë'ë yëi ñama acohua'i pa'ima' do'ire. Tsoe cahuë, ja'rë. ²⁷Yë'ë yëi ñamapi asayë, yë'ë yë'ona. Asajëna, yë'ëpi iohua'ire ñañë. Ñaquëna, iohua'ije yë'ëre pe'teyë. ²⁸Yë'ëpi ti ju'ima'pë pa'iyë isiquë a'ë. Isina, ti ne huesëma'pë pa'lja'cohua'i a'ë, cui'ne yë'ë jëñare pa'icohua'ire yecohua'i mañaje jioye ti peoji. ²⁹Yë'ë ja'quëpi yë'ëna isipi, iohua'ire. Isisiquë cato si'aye jerepa pa'i api. Ite cato yecohua'ije ti jio t̄i'añe peoji, i jëtëre pacohua'ire. ³⁰Yë'ë cui'ne ja'quë con̄i tel'ije pa'iohua'i pa'iyë.”

³¹J̄a maca judío p̄ai cui'naohua'ipi quëna pëapi imani jëañu'u cajë yo'ohuë. ³²Yo'ojëna, Jesupi capi:

“Mësaruru asajëna, jaiye de'oyere necaë'ë, yë'ë ja'quë tuture papi. ¿Iye nesi do'i aye mësarupi asato jeco a'ni, yë'ë col'aye yo'osico, jaje quëna pëapi jëañu'u ca ja'ñe?”

³³Caquëna, judío p̄ai sheuohuë:

“Më'ë de'oye yo'osi do'ire më'ëre quëna pëapi jëoñe paja'cohua'i a'ë. Më'ëpi yë'ë a'ë, Diusu casi do'ire quëna pëapi jëaja'cohua'i a'ë, më'ëre. Më'ë cato coa p̄aita'a, yë'ë Diusure pa'ë caquë yo'oyë.”

³⁴J̄a maca Jesupi capi:

“Mësaruru cuañënepi toyase'e caji Diusu mësarute case'ere ñeje: ‘Mësaruru a'ë, diusuohua'i.’ ³⁵Toyase'e caye cato nuñerepa caye a'ë. Jaje pa'ina, care paji cajë asayë, mai. Diusupi hue'yopi, i coca asasicohua'ire diusu a'ë, mësaruru. ³⁶¿Diusupi yë'ëre huani iye yejana jëjo daosiquëpi Diusu mamaquë a'ë caye me neni co'aquë'ni? ³⁷Ja'quë yo'oyere yë'ëpi yo'oma'ëna, ire papi caye pajë'ë. ³⁸Jaje pa'iquëta'are yë'ëpi yo'okuëna, ire papi yo'oji cajë asama'cohua'ita'a yë'ë yo'o iñoñere ñajë Maija'quë yo'oye a'ë cajë asajë'ë. J̄a maca yureta'a asa t̄i'añe pa'lji, Maija'quëpi yë'ë ja're pa'lji, cui'ne yë'ëpi i ja're pa'lji.”

³⁹Tijupë tseani preso saye yëhuë. Jaje pa'iquëta'are Jesupi de'hue jëapi.

⁴⁰Jā maca Jesús Jordán tsiaya ësë mëi te'tena co'ipi. Co'ini jaronā pëapi, Juan oco doquë pa'i sitona.

⁴¹Jarote pa'ina, jai pāi i quë'rona sani ñajë cahuë:

“Nuñerepa Juan, pāi yo'o tī'a ma'ñere yo'oma'quëta'a care paquë case'le paji'i, iquë yo'o ja'ñe ayere.”

⁴²Jaronā jai pāi ire papi cajë cuasahuë, ite.

Lázaro Jūni Huesëse'e

11 ¹Te'i ëmë ju'iquë Lázaro hue'equë paji'i. Jaë cato Betania aquë paji'i. María cui'ne io yo'jeo Marta pa'i daripë aquë paji'i. ²María cato ju'iquë Lázaro yo'jeo paco'ë. Jao cato Èjaërepa nëcañoana huëo së da'capi jañuni io nañapi tēnocaio yo'osico paco'ë. ³Jaje pa'ina, jaohua'ipi Èjaë më'ë cajeipi ju'iji caquë sani quëacajjë'ë cajë Jesús quë'ro jëjo saohuë, te'ire.

⁴Jëjo saorena, Jesús jare asani capi:

“Iye ju'i dahuë cato ti jūni huesëyena saye pā ja'ñe a'ë. Diusu i de'oquë pa'iyere ñño ja'ñe a'ë. Cui'ne Maija'quë mamaquë de'oquë pa'iyere ñño ja'ñe a'ë.”

⁵Jesús cato Marta cui'ne io maja'yo Marfare cui'ne Lázarore ai oiquëta'a. ⁶Caya mu'seña se pëa cōpi, i pa'i hue'ñana, Lázaro ju'iji cajë quëasichua'ita'are. ⁷Jā jeteyo'je capi, Jesús i ye'yacohua'ire:

“Sani cōñu'u, Judeana.”

⁸Caquëna, i ye'yacohua'ipi ite cahuë, jā maca:

“¿Ye'yaquë, më'ère judfo pāi quëna pëapi jeañu'u ca sitona co'ija'quë aë?”

⁹Cajëna, Jesupi capi:

“¿Te'e mu'se doce hora pa'icoa, miañe? Jaje pa'ina, paipi mu'se cu'ini ti ju'aye peoji, iye yeja miacaiyeja'a cu'ini.” ¹⁰Jaje pa'iquëta'are paipi ñani cu'ini ju'aye pa'iji, miañe peo do'ire.

¹¹Jā jeteyo'je Jesupi capi:

“Mai cajei Lázaro caji'i. Caisiquëta'are sani ne sëtōja'quë a'ë.”

¹²Caquëna, jā maca i ye'yacohua'ipi cahuë, ite:

“¿Èjaë, jaje caji'i cani co'yaja'quë api caye a'ni?”

¹³Jesús cato jaje cani ju'iji caquë capi. Jaje caquëna, i ye'yacohua'ipi cuasani coa huëore caina caji cuasahuë. ¹⁴Jā maca Jesupi yureta'a tññarepa capi:

“Lázaro tsoe ju'iji. ¹⁵Sihuayë, de'oye jarote pa'ima'ëna ju'iji. Jajepi ai de'o'ji. Mësarū ñani mësarū ire papi cajë yë'ère cuasaja'cohua'ire. Sani ñañu'u.”

¹⁶Jā maca Tomás Gemelo hue'equëpi i ja're ye'yecohua'ire capi:

“Jënajë'ë, maije i ja're cōni sañu'u, te'e i ju'ina ju'ija'cohua'i.”

Ju'isichua'ipi Huëiye Cui'ne Pa'iyē A'ë, Jesús

¹⁷Tsoe Lázarote cuatro mu'seña tase'e pa'ina, Jesús tī'api. ¹⁸Betania cato Jerusalén ja'yere paji'i, coa caya kilómetropi cui'ne yequë jopo kilómetro

coşi macare. ¹⁹Jai p̄ai judío p̄ai acohua'ipi Marta cui'ne Maríare do'í ñajë cui'ne iohua'í maja'yëpi juquëna, oicohua'ini yëhuo huasoñu'u cajë daisicohua'ipi paë'ë. ²⁰Ja maca Martapi Jesús daiji asani etani ite pëpasi'í caco sacco'ë. María cato huë'e sa'nahuëre paco'ë. ²¹Ja maca Martapi Jesure cao:

“Ëjaë, më'ë ñnore pa'iquë pa'ito yë'ë a'yë ju'íne para'pi. ²²Jaje pa'iquëta'are yë'ë cato asayë, Maija'quëpi më'ë señere isija'quë api.”

²³Cacona, Jesupi capi:

“Më'ë a'yë cui'naëpi pani coja'quë api.”

²⁴Caquëna, Martapi cao:

“Jaje pa'ijë'ë. Cui'naëpi pani coja'quë api, j̄uni huesësicohua'í huëi maca t̄ëji mu'serepa.”

²⁵Cacona, Jesupi capi:

“Yë'ë a'ë, j̄uni huesësicohua'í huëiye cui'ne pa'iye. Yë'ëre ire papi caquë cuasaquë cato ju'isiquëj̄e j̄are pa'ija'quë api. ²⁶Cui'ne ja yë'ta'a huajëquë pa'í yë'ëre ire papi caquë cuasaquë cato ti ju'íne paja'quë api. ¿Iye yë'ë caye j̄aje pa'ire paji caco cuasaco, më'ë?”

²⁷Caquëna, iopi cao:

“Jaje pa'ijë'ë, cuasayë, yë'ë. Cui'ne Ëjaë, më'ë cato Cristore papi asayë, yë'ë. Diusu mamaquëpi iye yejana daija'quë ca nëosiquëpi daisiquë a'ë, më'ë.”

Lázarore T̄a Sitona Jesús Oise'e

²⁸Jaje se ca t̄ëjini Marta io maja'yo María quë'rona sani cao, yahue:

“Ye'yaquë ñnore pa'í më'ëre daij̄aco caquë soiji.”

²⁹Cacona, it̄i se asayeja'a Jesús quë'rona esa sacco'ë, ite ñasi'í caco. ³⁰Ja yë'ta'a Jesús p̄ai daripërepa cacaye p̄api. Ja maca cato, Marta ite t̄i'asi macare p̄aji'í. ³¹Maríapi co'arepa huëni saiona, ñani judío p̄aipi María huë'ere pa'ijë oima'o cajë yëhuocohua'ipi t̄asi daripëna sani osi'í caco saico cuasajë tuë'ë.

³²Ja maca María Jesús quë'rona sani do're ja'runi cao:

“Ëjaë, ñnore më'ë pa'iquë pa'ito a'yë j̄uni huesëye para'pi.”

³³María ja're con̄i judío p̄ai daisicohua'ipi oijëna, Jesupi jaohua'ire oi ëayerepa ñapi. Ñani i joyopi ca ëayerepa nëina, ³⁴Jaohua'ire seji'í:

“¿Jerona ite t̄are'ni?”

Caquë seina, iohua'ipi cahuë:

“Ëjaë, dani ñajë'ë. Ñona t̄ahuë.”

³⁵Ja maca Jesús oji'í. ³⁶Oina, ñani judío p̄aipi cahuë, ja maca:

“I ai oiquërepa p̄aji'í. Ñajë'ë, i oiyere.”

³⁷Yecohua'ipi cahuë:

“Ñama'quëre ñaquëre nesiquë api, iquë. ¿Jaje pa'ta'a cui'ne me yo'oquë Lázarore jujucaiyë paë'ni?”

Lázaro Huëise'e

³⁸Cui'naëni co'arepa esa necati'ñrepa nëina, tasi daripë quë'rona tsio daji'i. Coje nesico paji'i. Pa'ioni jai quëna pëpi siosico paji'i. ³⁹Pa'iona, Jesupi capi:

“Quëna përe hui'yo jeojë'ë.”

Caquëna, Marta ju'isiquë yo'jeopi cao:

“Ëjaë, tsoe co'a sëji cuasayë. Tsoe cuatro mu'seña pa'iji.”

⁴⁰Cacona, Jesupi capi:

“Më'ëje pa'ioni cahuë care paji cuasani më'ë ñaja'coa'ë, Maija'quë de'oyerepa yo'oquëna case'e.”

⁴¹Caëna, ja maca quëna pë hui'yo jeorena, Jesús ma'tëmo mëne ñaquë capi:

“De'oji, Ja'quë. Yë'ë caye më'ëpi asacaë'ë. ⁴²Yë'ë cato asayë, më'ë si'anë yë'ë caye asaquë pa'iye. Jaje pa'iquëta'are iye maca pa'icohua'i asa ja'ñere caquë cayë, më'ëpi yë'ëre jëjo daosiquë api cajë asare pajajë caquë.”

⁴³Jaje se ca tējini, ai tutu cuiipi:

“¡Lázaro etajë'ë!”

⁴⁴Caquëna, ju'isiquë pa'isiquëpi jëña, nëcañoa huesiquëpi, cui'ne tsiaje cañapi huesiquëpi etapi. Etaquëna, ja maca Jesupi capi:

“Joyecajjë'ë, saijaquë.”

Jesure Tseañu'u Cajë Yo'ose'e

(Mt. 26.1-5; Mr. 14.1-2; Lc. 22.1-2)

⁴⁵Jaje iyere yo'ouna, Jesure jai pai judío pai ire papi cajë cuasahuë, María ja're coni daisicohua'ipi, iti Jesús yo'oquëna, ñasicohua'ipi. ⁴⁶Jaohua'i acohua'ipi fariseo pai quë'rona sani ñajë quëahuë, Jesús yo'ose'ere. ⁴⁷Ja maca fariseo paipi cui'ne Maija'quë huë'e ñacaicohua'i ëjaohua'ipi ca tēji ëjaohua'i quë'rona tsisini cahuë:

“¿Me neja'cohua'i a'ni, jaëte? I cato jaiye pai yo'o tija ma'ñe yo'o iñoji, paire. ⁴⁸Jaje pa'ina, maipi coa ñacohua'i pa'ito si'a paipi ise'ena asa huesëja'cohua'i pa'ini. Jaje yo'ojëna, yureta'a romano paipi dani Maija'quëre se huë'e cui'ne mai yeja ne huesoja'cohua'i pa'ini.”

⁴⁹Cajëna, Caifás hue'equëpi Maija'quë huë'e ñacaicohua'i ëjaëpi ja ometëcahuë pa'iquëpi capi, jaohua'ire:

“Mësaru huesëjë cayë. ⁵⁰Cui'ne ti asama'pë, te'li jucacati'ñe pa'i api, si'a pai do'ire ai jerepa si'a pai ju'iñe peoye, iye daripë pa'icohua'ire.”

⁵¹Caifás cato ise'e ta'ñe jaje caye papi. Coa Maija'quë joyopi isiquëna, capi, ja ometëcahuë Maija'quë huë'e ñacaicohua'i ëjaë sëte, Jesupi judío pai do'ire jucacaiye pa'iji, pa'i ja'ñere ca nëoquë. ⁵²Coa judío paise'ere caquë jucacaiye pani cui'ne si'a huë'ña coa tiya huesësicohua'ire Diusu mamajëre.

⁵³Jare ja mu'sepi yureta'a judío pai ëjaohua'i Jesure huani jëone ca nëohuë.

⁵⁴Jaje pa'ina, Jesús yureta'a si'a judío pai ñajëna, cu'iye papi. Paquë Judeapi etani Efraín daripëna saji'i, cuene yeja ja'ye maca pa'i daripëna. Jaronana sani i yelacohua'i ja're pëapi.

55 A'ri maña carapi, Egíptopi Israel p̄ai etajë pa'ise'ere cuasajë tsi'sini yo'o mu'seña. J̄aje pa'ina, jai p̄ai pa'i daripëa pa'icohua'i saë'ë, Jerusalénna si'sire tsoa toñere cajë. 56 Jesure co'ejë cuë'ë. J̄aje pa'ina, Maija'quë huë'ere pa'ijë seil'ë, yecohua'ire:

“¿Mësaru me cuasaye'ni? Daija'quë api fiestana, panita'a paja'quë api cuasaye cajë.”

57 Fariseo p̄ai cui'ne Maija'quë huë'e ñacaicohua'i ëjaohua'ipi cuañe nõohuë. Jesús pa'i hue'ñare asasicohua'i pani quëajë'ë, sani tseaja'quëre cajë.

Huëo Sëñepi Jesure Tsoacaise'e

(Mt. 26.6-13; Mr. 14.3-9)

12 1 Seis mu'seña Egíptopi Israel p̄ai etajë pa'ise'ere cuasajë yo'oye caraquëna, Jesupi Betaniana saji'i. Lázaro pa'i hue'ñana ju'isiquëni Jesupi ne co'yasiquë paji'i, jaë cato. 2 J̄arona Jesure āo cua'coni āohuë. Martapi āo huahuco paco'ë. Lázaropi Jesús ja're con̄i mesare ñu'i aji'i. 3 J̄a maca Maríapi huëo s̄e ma'ña da'care dani Jesús quëona ja'ñeni īo nañapi t̄eno cuënao. J̄aje yo'ocona, si'a huë'e huëo s̄eñena timëo. J̄a cato jai do'i ma'ña paji'i. 4 J̄a maca Judas Iscariotepi Simón mamaquëpi Jesús ye'yaquëpi, Jesure coso yehuoja'quëpi capi:

5 “¿Me yo'oco iye huëo s̄e ma'ña coa yecohua'ina se isico trecientos romano curiquë t̄e'ña nema'o paco'ni, neni curi peocohua'ire co'caija'cota'a?”

6 Judas jaje cani curiquë peocohua'ini ai oi do'ire cama'ë paji'i. Co'amaña yahue imaquëpi capi. J̄aje ipi curi aya topë paquë s̄ete, yahue imaquë paji'i, īona yecohua'ipi aya curire. 7 J̄a maca Jesupi ite capi:

“Coa ñajë'ë. Yë'ëre t̄a mu'se huëo s̄e ja'ñere ne de'huaco yo'oco. 8 Curi peocohua'ire si'anë mësaru ñajë paja'cohua'i a'ë. J̄aje pa'iquëta'are yë'ëre cato si'anë paye peosipi.”

Lázarore Sañope Case'e

9 Jesús Betaniare pa'iji asani jai p̄ai judío p̄ai saë'ë, j̄arona. Jesuse'ere ñañu'u cajë saiye p̄ahuë. Lázarore ñañu'u, Jesús ju'isiquëni huëosiquëre cajë saë'ë. 10 Cui'neje Maija'quë huë'e ñacaicohua'i ëjaohua'ipi Lázaroreje huani j̄eone pa'iji cahuë. 11 Judío paipi Lázaro do'ire Jesupi ire papi cajë cuasa do'ire, cui'ne iohua'ire j̄eoco do'ire j̄aje cahuë.

Jerusalénna Jesupi Cacase'e

(Mt. 21.1-11; Mr. 11.1-11; Lc. 19.28-40)

12 Jai p̄ai Jerusalénna saë'ë, Egíptopi Israel p̄ai etajë pa'ise'ere cuasajë yo'o mu'se t̄i'aëna. Se ñatasi mu'se Jesús daija'quë api, iye daripëna asani. 13 J̄a maca Jesús daina, sihuajë ja'o t̄eteni cuijë saë'ë. Jesure p̄epañu'u cajë cuihuë:

“¡De'oquëre pa'ni, Diosu! ¡De'oquëre pa'ni, Ejaë mamirepa hue'equëpi daiquë! ¡De'oquëre pa'ni, Israel p̄ai Ejaë!”

14Burrore tì'ani Jesús tui saji'i, toyase'e cayeje pa'ye japi caji ñeje:

15 Ca'rama'o pa'ijè'ë.

Israel paì daripè

Mè'ë Èjaërepa daiji, burroni ñu'i.

16Iye case'e ì ye'yacohua'i asa tì'añe pahuè, du'ru macarepa cato. Jesús de'loquërepa de'osi maca ja maca yureta'a asahuè, si'aye Jesús ayere toyase'e paji'i cajè cui'ne jaje tètò saji'i, mai ña hue'ñana cuasajè.

17Jesús ja're pa'ijè Lázaro jūquëna, tasiquëni huëoquë soiquëna, asasicohua'ipi yecohua'ire se quëahuè, ìohua'i ñase'ere. 18Jaje pa'ina, Jesure sañope tì'ani pëpañu'u cajè saè'ë, paì yo'o tì'a ma'ñere yo'loquëna, asasi do'ire cajè. 19Ja maca fariseo paipi cahuè, ìohua'ija'a sa'ñe:

“Ñañe mësaru si'a paì ise'ere tuiye, yure cato ne tì'añe peoji.”

Griego Paipi Jesure Co'ese'e

20Fiesta pa'i maca Maija'quëre se'ñu'u cajè Jerusalénna saiscohua'i ja're conì griego paìje paè'ë. 21Pa'icohua'ipi jaohua'ipi Felipeña tsio dani Betsaida Galilea aquëna sejè cahuè:

“Èjaè, yëquë Jesure ñañe yëyë.”

22Jaje cajëna, asani Felipepi sani Andrésni capi. Cani yureta'a cayaohua'i Jesure sani cahuè. 23Cajëna, Jesupi ja maca capi:

“Tsoe tì'api, Maija'quë mamaquë de'loquërepa de'o'jai maca. 24Mësarute cayë, trigo capi yejana tomema'co pani jare te'e ca maca pa'io carajaicoa. Jaje pa'iquëta'are ìti capi yejana tomeni junita'a jaiye quëicoa, ìti ñëpi mëani. 25I pa'iyere ai oiquë cato coa ne huesoja'quë api. Jaje pa'iquëta'a iye yeja pa'iyere coequë cato ne de'huaquë pa'iji, ti pani huesë ja'ñere. 26Paipi yè'ëre necaiye yëni tuijè'ë, yè'ëre. Yè'ëre necaiquë cato, yè'ë pa'i hue'ñare conì pa'ija'quë api. Paipi yè'ëre necaiquë pa'ito yè'ë ja'quëpi ìte de'loquëre pa'ni caquë ñacaija'quë api.

Jesupi Quëaji, Ì Ju'i Ja'ñere

27Yure cato yè'ë ai oiyè. ¿Ja do'ire ja'quëre ñeje ca tì'añe pa'iquë? ‘¿Ja'quë huasojè'ë, yè'ëre yure tètò sai ja'ñere?’ Jaje ca tì'añe peoji. Yè'ë cato jare caquë daisiquë a'ë. 28Ja'quë mè'ë mamire jerepa de'o mami nejë'ë.”

Ja maca asapi, ma'tëmopi yè'ose'e pìsiquëna:

“Tsoe de'loquëre pare nehuë. Jaje pa'iquëta'are tijupè de'loquëre pare ne così'i.”

29Ìti maca nëcajè asasicohua'ipi cahuè, mujuëpi pìsiji. Cajëna, yecohua'ipi cahuè:

“Huiñaëpi ìni cocare capi.”

30Ja maca Jesupi capi:

“Yè'ëni caquë iye yè'o pìsiye paipi. Mësaru asa ja'ñere caquë iye yè'o pìsipi. 31Yure a'ë, iye yeja io yo'ose'e ña de'hua cuaño ja maca, cui'ne yurepi iye yeja cuañequëje ì tutu nejo cuañosiquë pa'ija'quë api. 32Yè'ëpi cruzuna mëa deo cuañosi maca si'ahua'ire tsi'so saosì'i yè'ëse'ena paire.”

³³Ja quëayena pai asahuë, cruzuna ju'ija'quë a'ë caquë quëaye. ³⁴Pai pi asani sañope sehuohuë:

“Yëquë cato yequë toyapë ñacohua'i a'ë, Cristo ti ju'iñe peoji cayere. ¿Me yo'oquë mè'ë Pai Mamaquë cruzuna ju'ija'quë a'ë caquë'ni? ¿Iquei'ni, Pai Mamaquë?”

³⁵Ja maca Jesupi capi:

“Ja yë'ta'a mësaru ja're miañe pa'iji. Ja yë'ta'a miañe pa'i maca miañeja'a cu'ijë'ë, neañepi tsio daiona, merepa yo'oco'ni cajë ai cuasaye pa'cohua'i. Nea hue'ñaja'a cu'iquë cato i sai hue'ña huesëquë coa saiji.

³⁶Miañe itire pare pa'iyë cajë asajë'ë, ja yë'ta'a mësaru ja're coní miacai pa'i macapi. Jaje pa'ijë yureta'a mia hue'ña pa'icohua'irepa ponëja'cohua'ipi.”

Jaje ca tējini Jesús sani catipi, iohua'ire.

Judío Pai Jesure Sehuoye Pase'e

³⁷Jaiye Jesús pai yo'o tija ma'ñere yo'o inosiquëta'are ire papi cajë cuasaye pahuë. ³⁸Maija'quëre quëacaiquë Isaías ñeje toyaquë pa'ise'epi tija ja'ñepi pa'ina, pahuë asaye. Toyase'e cato caji:

Èjaë ¿nepi yëquë quëase'e care payë cajë asare'ni?

¿Neni Diusu iño u'ni, i tutu?

³⁹Jaje pa'ina, asa tija'ne pahuë. Yequeje Maija'quëre quëacaiquë Isaías toyapi, ñeje:

⁴⁰Diusupi ñama'cohua'ire cui'na jëa joyo quë'iohua'ire nepi,
Ñaco capi ña ma'ñe caquë, Cui'ne joyopi asa ma'ñe caquë,
Cui'ne Maija'quëna ponëni juju cuañoma'cohua'ini caquë.

⁴¹Iye cato Isaías capi, Jesús de'oquërepa pa'iyë ñasiquëpi. Jaje pa'ina, i ayere capi.

⁴²Jaje pa'iquëta'are jai pai judío pai Jesure ire papi cajë cuasahuë. Yecohua'i ëjaohua'ire paque cuasahuë, Jesure. Jaje pa'iquëta'are jai pai cuasajëna, quëaye pahuë, fariseo paini ca'ra do'ire, pai tsi'si hue'ñapi eto sao ma'ñe cajë. ⁴³Fariseo pai cato paipi iohua'ini de'ocohua'ire pa'ni cacaiyere yëcohua'i paë'ë. Maija'quëpi de'o'ji cayere coecohua'i paë'ë.

Jesús Casi Yë'opi Pai Yo'ose'e Ca De'huaye Pa'iji

⁴⁴Jesús ai tutu capi:

“Yë'ëre ire papi caquë cuasacuë cato yë'ëse'ere asaye peoji. Yë'ë ja'quë yë'ëre jëjo daosiquëreje asaji. ⁴⁵Yë'ëre ñaquëpi yë'ëre jëjo daosiquëreje ñaji. ⁴⁶Yë'ëre ire papi cajë cuasasicohua'ipi nea hue'ñare pa'ima'pë pa'ijajë caquë mu'se miañeje pa'ipi yë'ë iye yejana daë'ë. ⁴⁷Jaje pa'iquëta'are yë'ë caye asaquëta'a yë'ë cayeje yo'oma'quëre yë'ëpi nejoñe paja'quë a'ë. Yë'ë cato iye yejana daisiquë a'ë, iye yeja pa'icohua'ire huasosi'i caquë. ⁴⁸Yë'ëre coequëpi cui'ne yë'ë caye asani cui'ne yo'oma'quë cato, tsoe paji, ite nejo ja'ñe. Yë'ë

case'epi tēji mu'serepa paire nejo ja'ñe a'ë. 49Yë'ë cuasayepi huëoquë cama'lë pa'iyë. Yë'ë ja'quë yë'ëre jëjo daosiquë cuañese'ere caquë ye'yayë, ì case'ejje pa'ye caquë asayë, yë'ë. 50Ja'quë cuañese'e cato ti pani huesë cocare pa'lë caquë asayë, yë'ë. Jaje pa'ina, yë'ë cayë cato ja'quë cuañese'ejje pa'ye a'ë."

Ì Ye'yacohua'i Quëore Jesupi Tsoa Tose'e

13 1Ja yë'ta'a Egítopi Israel pai etajë pa'ise'ere cuasajë yo'o mu'se ti'ama'ë te'e mu'se carapi. Jesupi tsoe asapi, je'nërepa iye yeja pani tējini pëca ja'quë quë'rona co'iye ti'ase'e. Si'anë Jesús cato ai oiquë paji'i, ì tsecohua'ire iye yeja pa'icohua'ire. Jaje pa'ina, yure cato ì ai oiye pare ñnoquë yo'opi.

2-4Huati cato Simón mamaquëna Judas Iscariote joyona tsoe co'aye cuasaye nepi. Jaje pa'ina, Jesure coso yehusosi'i cuasayere papi, ì joyo. Jesús cato Diusu quë'ropi daisiquë a'ë asaquëpi, cui'ne co'ija'quë a'ë Diusu quë'rona asaquëpi paji'i. Cui'ne ja'quëpi yë'ëre ëjaërepa pa'i ja'ñe tutu isipi asaquë paji'i. Jaje pa'ina, Jesús ì ye'yacohua'i ao aijëna, conì ñu'i aiquëpi, huëni ì ëmëje'e ju'icore dutani, ì ju'ruhuëna toayapi sëapi. 5Ja maca quëna de'huana oco doni ì ye'yacohua'ire quëo tsoa huëopi. Tsoaquë ì toaya ju'ruhuëna sëasicopi tëno cuenacaji'i.

6Simón Pedro quëore tsoasi'i caquë yo'oquëna, ipi capi:

“¿Ëjaë, më'ëpi yë'ë quëore tsoacasi'i caquë yo'oquë?”

7Caquëna, Jesupi sehuopi:

“Yure më'ë huesëyë, yë'ë caquë yo'oye. Pasiquëta'a jeteyo'je më'ë asa ti'aja'quë a'ë.”

8Jaje caquëta'are Pedropi capi:

“Yë'ë quëo më'ëpi tsoacaiye peoji.”

Caquëna, Jesupi capi:

“Yë'ëpi më'ëni tsoa tocaima'quë pa'ito më'ë yë'ë te'te aquë peoja'quë a'ë.”

9Caquëna, Simón Pedropi capi:

“Jaje pa'ito Ëjaë, coa quëose'e tsoama'ë pa'ijë'ë. Yë'ëre jëñaje cui'ne siopëje tsoacaijë'ë.”

10Caquëna, Jesupi capi:

“Ja'a cuyasiquë cato coa nëcañoase'e tsoaquë api, si'aë de'oquë pa'iyë sëte. Mësarü cato sisi peocohua'i a'ë. Jaje pa'iquëta'are si'ahua'i de'ocohua'ise'e pa'iyë pañë.”

11Si'ahua'i si'si peocohua'ise'e pa'iyë pañë capi, ìte coso yehuoja'quëque pa'ina, asaquë.

12Quëo ja'o tsoa tējini ì ëmëje'e ju'icore suñani cui'naëpi mesana ja'runi capi:

“¿Mësarü yë'ë caquë yo'ose'e asa ti'añe? 13Mësarü yë'ë Ëjaëpi cui'ne ye'yaquë api, cani nuñerepa cayë, jaëre pani. 14Yë'ë Ëjaëpi cui'ne ye'yaquëpi mësarü quëo tsoasiquëre sëte mësarujë yecohua'i quëo ja'oñare tsoacaiye pa'iji. 15Iye cato mësaruni yo'o ñnoquë yo'ohuë. Jaje yo'ojë'ë, caquë yë'ë

yo'ose'ejje. ¹⁶Nuñerepa mésarute cayë. I jo'yaëpi i ëjaëre tëto saisiqüë peoji, cui'ne jëjo dao cuañoquëje ite jëjo daoquëre tëto saisiqüë peoji. ¹⁷Asa tì'ani yè'ë case'ejje pa'ye yo'ocohua'i pani sihuacohua'i pa'ija'cohua'i a'ë.

¹⁸Mésarute si'aohua'ire pare cama'ë pa'iyë, coa yè'ë sahua nëosiquëse'ere cayë. Toyase'e cayepi tì'añe pa'iji. Japi caji: 'Yè'ë ja're conì aiqüëpi yè'ëre sañope yo'oquë ponëpi.' ¹⁹Iye cato mésarute cayë itipi tëto saina, ñani mësarupi nuñerepa ire papi capi cajë yè'ëre asa ja'ñere caquë. ²⁰Nuñerepa cayë, mésarute. Yè'ë jëjo daoquëre sihuaquë de'oye yo'oquëpi yè'ëreje sihuaquë de'oye yo'osipi. Yè'ëre sihuaquë de'oye yo'oquëpi, yè'ëre jëjo daoquëreje sihuaquë de'oye yo'osipi."

Judas Yo'oquë Yehuo Ja'ñere Jesús Quëase'e

(Mt. 26.20-25; Mr. 14.17-21; Lc. 22.21-23)

²¹Ja casi jeteyo'je Jesús i joyopi ca'ñerepa nëina, capi, si'aye tiñarepa: "Nuñerepa cayë. Mësarü aquëpi yè'ëre yo'oquë yehuoja'quë api."

²²Ja maca i ye'yacohua'ipi sa'ñe iohua'ija'a ña huëohuë, nepi yo'oja'cohua'ini cajë huesëjë. ²³I ye'yacohua'i aquëpi Jesús i yëquëpi i yè'quë macare ñu'i aji'i, na'liqüëna, añere. ²⁴Aina, Simón Pedropi coa moñopi më'ëpi seni asajë'ë, nepi yo'oja'cohua'ini caquë'ni caquë yo'opi. ²⁵Yo'oquëna, ñani Jesuna tsio jani seji'i: "¿Ejaë, jequë a'ni, iti yo'oja'quë?"

²⁶Caquëna, ipi sehuopi:

"Panpë yè'ëpi sa'suni aokuë cato i pa'ija'quë api."

Jaje cani panpë ini sa'suni Judas Iscariotena aopi, Simón mamaquëna.

²⁷Jare panpë i maca tsoe huatije Judas joyona cacapi. Ja maca Jesús capi ite: "Më'ë yo'o ja'ñe pa'lito esa yo'ojë'ë."

²⁸Jaje catoje iti maca mesa ñu'icohua'i asa tì'añe pahüë, i cayë.

²⁹Judaspi curiquë de'hua turupë paquëre sëte yecohua'i cato cuasahuë, sani aore huerojajijë'ë fiesta yo'o ja'ñere caquë caji cuasahuë. Panita'a curiquë peocohua'ina sani isijë'ë caquë Jesús caji cuasahuë. ³⁰Panpë isisi jeteyo'je Judas etani saji'i. Ja maca cato tsoe ñami paji'i.

Huajëye Cuañese'e

³¹Judas etani saisi maca Jesupi capi:

"Yure iñoñe pa'iji, Pai Mamaquë de'oquërepa pa'iyë. Cui'ne Diosu de'oquërepa pa'iyëje iñoja'quë api, ipi. ³²Maija'quë de'oquërepa pa'iyere Pai Mamaquëpi iñoquë pa'lito, Maija'quëje mamaquë de'oquërepa pa'iyere iñosipi. Esa iñoja'quë api. ³³Tsi dohuë, mësarü ja're conì tsoe pa'iyë pajaj'quë a'ë. Mësarü yè'ëre co'ejaj'cohua'i a'ë. Jaje pa'ina, jare judío paire case'ejje mésarute cayë. Mësarü yè'ë sai sito sani tì'añe peoji. ³⁴Mësarute huajëye cuañëre isiyë, paire oicohua'i pa'iyere yè'ë mésarute oiyëje. Cui'ne mësarupi yecohua'ire se oijë pa'ijë'ë, caquë. ³⁵Yecohua'ire mësarupi oicohua'i pa'lito paipi mésarute yè'ë ye'yacohua'ire pa'ë cajë ñaja'cohua'i a'ë."

Pedro Coa Cosoquë Ca Ja'ñere Jesupi Quëapi
(Mt. 26.31-35; Mr. 14.27-31; Lc. 22.31-34)

³⁶Simón Pedropi Jesure capi:

“Ëjaë, ¿më'ë jerona sai caquë'ni?”

Caquëna, Jesupi sehuopi:

“Yë'ë sai hue'ña më'ë tuni tì'añe peoji, yure cato. Jeteyo'je më'ë cato tuija'quë a'ë, yë'ëre.”

³⁷Ja maca Pedropi capi:

“Ëjaë, ¿me yo'oquë yë'ë yure tuni tì'añe peoquë'ni? Yë'ë cato tsoe cui'ñasiquëpi pa'iyë, më'ë do'ire yë'ëpi saicasa'i caquë.”

³⁸Caquëna, Jesupi sehuopi:

“¿Nuñerepa yë'ë do'ire më'ëpi saicare pasi'i caquë cui'ñasiquëpi pa' caquë? Nuñerepa cayë. Më'ëre ja yë'ta'a cura yë'ima'në më'ëpi toasoñe cosoja'quë a'ë, yë'ëre ñama'quë a'ë caquë.”

Jesu Api, Maija'quë Quë'ro Tì'a Ma'a

14 ¹Ai co'a ju'ima'pë pa'ijë'ë. Diusuni necaiquë api cuasajë pa'ijë'ë. Cui'ne yë'ëreje necaiquë api cuasajë'ë. ²Ja'quë ma'tëmo huë'e cato jaiye pa'iji, pa'i hue'ña. Jaje pa'ima'co pa'ito, yë'ëpi mësarute tsoe quëara'huë. Jaje pa'iyë sëte yure cato saiyë, mësaruru pa'ija'to ne de'huacasi'i caquë. ³Saisiquëpi pa'i hue'ña ne de'hua tējini ja maca co'i coja'quë a'ë, mësarute sasi'i caquë. Saëna, mësaruru yë'ë pa'i hue'ñare pa'ijajë caquë. ⁴Mësaruru cato asayë, yë'ë sai hue'ña, cui'ne itti ma'aje asayë.

⁵Caquëna, Tomásipi capi:

“Ëjaë, yëquë huesëyë, më'ë sai hue'ña. ¿Me më'ë saija'a ma'aje asayë'ni?”

⁶Caquëna, Jesupi capi:

“Yë'ë a'ë, ma'a cui'ne yë'ë a'ë, nuñerepa cui'ne yë'ë a'ë, pa'iyë. Yë'ëja'a tì'añe pa'iji, ja'quëre. Peoji, yequëre tì'añe. ⁷Mësarupi yë'ëre ña tì'acohual'i pani ja'quëreje ña tì'ara'huë. Jaje pa'iquëta'are yure ite mësaruru ña tì'añë, tsoe ite si'anë ñajë pa'icohual'i sëte.”

⁸Ja maca Felipepi capi:

“Ëjaë, yëquëre ñnojë'ë, më'ë ja'quëre. Coa ja mañase'e yëyë.”

⁹Caquëna, Jesupi sehuopi:

“Felipe mësaruru ja're conì yë'ë tsoe pa'iyë. ¿Jaje pa'iquëta'are më'ë cato yë'ëre ti ñama'quë a'ë? Yë'ëni ñajë ja'quëreje ña'ne pa'iji. Jaje pa'ito ¿Me yo'oquë më'ë ja'quëre ñnojë'ë caquë sequë'ni? ¹⁰¿Më'ë huesëquë yë'ëpi ja'quë ja're tsoni pa'iyë, pa'ina, ja'quëpi yë'ë ja're conì pa'iyë? ¿Cui'ne më'ë asama'ë pa'iquë ja pa'iyë? Yë'ë caye cato yë'ëse'e cuasayëpi caye pañë. Yë'ë ja'quë yë'ëre pa'iquëpi i co'amaña yo'oji. ¹¹Pëca ja'quë ja're conì pa'ire paji cajë cuasajë'ë. Cui'ne ja'quëpi yë'ë ja're conì pa'iji cajë cuasajë'ë. Panita'a jare asa tì'añe panije yë'ë yo'oyena ñajë de'hue cuasajë'ë, care paji cajë. ¹²Nuñerepa

mësarute cayë. Yè'ère ire papi caquë cuasaquëpi, yè'è yo'o co'amañaje, yo'oja'quë api. Yè'ëpi yè'è ja'quë què'rona saquëna, ja do'ire ai seña maca de'o co'amañaje yo'oja'quë api. ¹³Mësarupi yè'è mamina cajë seto yè'ëpi yo'oja'quë a'ë. Mamaquëpi pëca ja'quë de'oquërepa pa'iyere ññoja'quë caquë. ¹⁴Yè'è mamina cajë seña, yè'ëpi yo'oja'quë a'ë, si'aye mësarü yè'è seña pa'ito.

De'o Joyore Jëjo Daoja'quë A'ë, Jesús Case'e

¹⁵Mësarupi yè'ère oicohua'i pani yè'è cuañese'ere sehuocaij'ë. ¹⁶Mësarü ja're si'anë pa'lja'quëre yequëre jëjo daoj'ë caquë ja'quëre ses'i, mësarute cõcai cui'ne quëcoye necaija'quëre. ¹⁷Jaë cato nuñerepa ca joyo pa'lja'quë api. Iye yeja pai jaëte pa t'iañe peoji, ite ñama'cohua'i cui'ne ite asama'cohua'i. Jaje pa'iquëta'are mësarü cato asayë, ite. Cui'ne ñpi mësarü ja're pa'lji. Pa'isiquëpi ti mësarü ja're pani huesëja'quë api. ¹⁸Mësarute te'ohua'ire jëjo sani huesoye paja'quë a'ë. Cui'naëpi pani coja'quë a'ë, mësarü ja're cõni. ¹⁹Ëa maca cato pai yè'ère ñañe paja'cohua'i a'ë. Jaje pa'iquëta'are mësarü cato yè'ère ñaja'cohua'i a'ë, yè'è huajëquë pa'ina, mësarujë huajëcohua'i pa'lja'cohua'i sëtë. ²⁰Ja mu'se mësarü yureta'a nuñerepa asaja'cohua'i a'ë, yè'ëpi ja'quë ja're cõni pa'iyë. Pa'ina, mësarupi yè'è ja're cõni pa'iyë asaja'cohua'i a'ë. Cui'ne yè'ëpi mësarü ja're cõni pa'iyë asaja'cohua'i a'ë. ²¹Tañe asaquëpi cui'ne yè'è cuañese'ere sehucquë yo'oquëpi, yè'ère oiye ññoji. Jaje pa'ina, yè'è ja'quëpi iteje oija'quë api. Oina, yè'ëje ite oija'quë a'ë. Jaje oi yè'ëpi ina tsio dani yè'ëse'ere ññoja'quë a'ë.”

²²Judas Iscariote peoquëpi, yequë Judaspi capi:

“Ëjaë, ¿me yo'oquë yëquëna ññoja'quë a'ni, më'ëse'ere. Me pa'ina, iye yeja paina më'è pa'iyë ññoma'ë pa'lja'quë a'ni?”

²³Caquëna, Jesupi sehuopi:

“Yè'ère oiquëpi yè'è cuañese'ere sehucquë cui'ne yo'oji. Jaje yo'oquëni yè'è ja'quëpi ite oija'quë api. Yè'è ja'quëpi cui'ne yè'ëpi cõni dani i ja're pa'lja'cohua'i a'ë. ²⁴Yè'ère oima'quëpi yè'è case'eye yo'oye paji. Iye coca mësarü yè'è tse peoji. Yè'ère jëjo daosiquë ja'quë tse a'ë.

²⁵Mësarü ja're ja yè'ta'a yè'è pa'i maca si'aye cayë. ²⁶Jaje pa'iquëta'are de'o joyopi ja'quë yè'è mami do'ire jëjo daoja'quë api. Jaëpi mësarute cõcai cui'ne oicohua'i pa'lj'ëna, yëhuoja'quë api, si'aye ye'yaquë. Cui'ne si'aye yè'è case'ere cuasa ñajaiñe necaija'quë api.

²⁷De'oye pa'iyere mësarute isicani saiye. Yè'è de'oye pa'iyere isiyë, mësarute. Iye yeja pai de'oye pa'iyë a'ë cajë isiyëje pa'yere isima'ë pa'iyë. Ca'rama'pë pa'lj'ë, cui'ne co'a ju'lima'pë pa'lj'ë. ²⁸Yè'è ja'quë yè'è jerepa pa'i què'rona saiye caquëna, mësarü asani ai sihuara'huë, yè'ère oicohua'irepa pani. Mësarü tsoe asahuë, saisiquëpi cui'naëpi dani mësarü ja're pasi'i caquëna. ²⁹Iye cato cayë, jaje t'ia ja'ñe pa'ina, itipi tëtë saina, ñani care papi cajë yè'ère cuasajajë caquë.

³⁰Ai jaiye mäsaru ja're caye pañë. Yure cato tsoe daiji, iye yeja cuañequëpi. Yè'ère meñe cuañëne peoquëta'a yo'oji. ³¹Jaje tëto saiye pa'iji, ja'quëre yè'ë oiye paipi ñajajë caquë, cui'ne i cuañëñere yo'oji cajë ñajajë caquë. Huëijj'ë. Sañu'u, tirona.

Cuiya'i Në Cui'ne İti Capëa Pa'ie

15 ¹Cuiya'i ñëje pa'i a'ë, yè'ë. Yè'ë ja'quë api, İti ñacaiquëje pa'i api. ²Yè'ë capëa İpi t'ca tëte jëaquëpi quëima' capëa. Jaje yo'oque quëi capëare pase'e nëoque api, ai quëija'quë caquë. ³Mäsaru cato tsoe de'oye jëo nëcosicohua'i a'ë, yè'ë iye coca quëa do'ipi. ⁴Yè'ëna tsiosicohua'irepa si'anë pa'ijj'ë, mäsaru cato, yè'ë mäsaruna tsiose'ëje pa'ye. İti capëse'e pani quëni t'i'añe peoji, İti ñëre pana tsiosicopi pa'ie panı. Jaje cui'ne mäsaruje yè'ë ja're tsiosicohua'ipi pa'ima'pë pani quëni t'i'añe peoyë.

⁵Yè'ë cato İti ñëre pa'ë. Mäsaru cato İti capëa'ë. Yè'ë ja're tsioni pa'ina, cui'ne yè'ëpi i ja're tsioni pa'iquëpi jaiye İti ca quëiñe pa'iji. Pa'ina, mäsaruse'e yo'o t'i'añe ti peoyë, yè'ë peoquëna. ⁶Yè'ë ja're conı pa'ima'quë cato nejo cuañoque api. Nejo cuañoni toa sua ja'ñe soquë capëa cueneñeje pa'yere tsı'soni ëoj'a'quë api.

⁷Mäsarupi yè'ë ja're tsiosicohua'ipi pa'ijj'ë cui'ne yè'ë ye'yase'ëje huanëyema'cohua'ipi, mäsaru yëyere secohua'ı pa'ito, si'aye mäsaru señe İsija'quë a'ë. ⁸Mäsarupi jaiye de'o co'amaña quëiñeje pa'ye yo'ojëna, yè'ë ja'quëpi pa'ini sihua cuañoji. Jaje de'oye yo'ocaijë yureta'a mäsarupi yè'ë ye'yacohua'irepa pa'ie t'i'añë. ⁹Yè'ë mäsarute oiye, yè'ëre ja'quë oiyeje pa'ye. Jaje pa'ina, yè'ë oiye pa'ijj'ë. ¹⁰Yè'ë cuañese'ere sehuocaijë cui'ne yo'oni yè'ë oiye pa'iyë. Ja'quë cuañese'ere yè'ë sehuocai yo'oquepi yè'ë ja'quë oiye pa'iyë, cui'neje.

¹¹Jare quëahuë, mäsarute. Yè'ë ja're te'e sihuajë cui'ne sihuayepi timësicohua'ı pa'ijajë caquë. ¹²Yè'ë cuañëne cato iye a'ë: Oijj'ë, yecohua'ire, yè'ë mäsarute oise'ëje pa'ye. ¹³Cajeohua'ire oi do'ire te'ı jucacaiye a'ë, ai oiye. Yequë peoji, ja jerepa pa'ye paire oiye. ¹⁴Mäsaru yè'ë cajeohua'ı a'ë, yè'ë cuañese'ere yo'oni. ¹⁵Mäsarute jo'yaohua'ire caye pañë. Te'e nuñerepa cajeohua'ire cayë, mäsarupi yè'ë İnosi do'ire, yè'ë ja'quë yè'ëre case'ere si'aye huesëma'pë asa do'ire. Jo'yaë cato huesëquë api, i ëjaë caquë yo'oye. ¹⁶Mäsarupi yè'ëre sahuani soima'pë pa'ë. Yè'ëpi mäsarute sahuani soihuë. Soini cui'ne cuañehuë, sani jaiye quëijj'ë caquë, ja quëiñepi ti pa'ija'quë caquë. Jaje jaiye quëicohua'ipi yè'ë do'ipi sejenä, ja'quëpi mäsaru sese'ere si'aye İsija'quë api. ¹⁷Iye a'ë, mäsarute yè'ë cuañëne: Sa'ñe oijj'ë pa'ijj'ë.

Iye Yeja Paipi Jesure Coejë Cui'ne Jesús Tsecohua'ire Coeye

¹⁸Iye yeja paipi mäsarute coecohua'ı pa'ito, yè'ëre du'ru coese'ere cuasajë oima'pë. ¹⁹Mäsarupi iye yeja acohua'ı pa'ito mäsarute otira'huë, İohua'ı cajeohua'ire oiye. Jaje pa'iquëta'are yè'ëpi mäsarute iye yeja

acohua'ini sahuani soisi do'ire mäsarute coeyë, iye yeja paipi, iye yeja acohua'i peo do'ire. ²⁰Yë'ë mäsarute case'ere cuasajë'ë. 'Necaiquë cato i ëjaëre tëto saisiquë peoji.' Jaje pa'iyë sëte yë'ëre pani sañope yo'osicohua'i me mäsarute sañope yo'oye pañe'ni cui'ne yo'oja'cohua'i a'ë. Cui'ne yë'ë ye'yayere sehuocaisicohua'i panita'a mäsaru ye'yaye sehuoja'cohua'i a'ë. ²¹Si'aye jaje yo'oja'cohua'i a'ë, yë'ë do'ire cui'ne yë'ëre jëjo daosiquëre huesë do'ire.

²²Yë'ë dani cama'quë pa'ito jaohua'i do'i peocohua'i patira'huë. Jaje pa'iquëta'are yure cato iohua'i tayo yo'o do'ire ca de'hua ti'añe peoyë. ²³Yë'ëre coequë cato ja'quëreje coeji. ²⁴Iohua'ique ñajëna, pa'i yo'o ti'a ma'ñere yë'ë yo'oma'quë pa'ito sañope yo'o ja'ñe peocohua'i patira'huë. Jaje pa'iquëta'are yure cato yë'ë yo'ouquëna, ñahuë. Jaje ñasicohua'ita'a yë'ëre cui'ne ja'quëre coeyë. Ja' do'ire do'i quë'iohua'i pa'iyë. ²⁵Iye cato yo'oyë, iohua'ina cuañeñe toyase'epi ti'ajaquë caquë nëina. Toyase'epi caji: 'Do'ije peoquëni yë'ëre coeyë.'

²⁶Jaje pa'iquëta'are Maija'quë quë'ropi paire çocaiquëre cui'ne nuñerepa yo'o joyore yë'ë jëjo daoquëpi, jaëpi yë'ë ayere cacaija'quë api. ²⁷Mäsaruje yë'ë ayere cacaija'cohua'i a'ë, yë'ë ja're çoni ai tsoe pa'isicohua'i sëte.

16 ¹Yë'ëre cuasayere ne hue'soma'pë mäsarupi taiñe pajajë caquë iye mäsarute cahuë. ²Pa'i tsi'si huë'ñapi mäsarute eto saoja'cohua'i a'ë. Jaje yo'ojë mäsarute huani jeaja'cohua'i a'ë. Jaje yo'ojë Diusuni de'oye necaiyë cuasaja'cohua'i a'ë, huaicohua'ipi. ³Iye cato yo'oja'cohua'i a'ë, ti ja'quëre cui'ne yë'ëreje asama'cohua'ipi. ⁴Iye cato mäsarute cayë, iti ti'asi maca yë'ë case'ere cuasa ñajaijajë caquë. Mäsaru ja're pa'i do'ire jaje caye pahuë, ja'a huëo maca.

De'o Joyo Yo'oye

⁵Jaje pa'iquëta'are yure cato saiye, yë'ëre jëjo daosiquë ja're pasi'i caquë. Mäsaru aquëje ti te'ije yë'ëre seni asaye paji, jerona më'ë saiquë'ni caquë. ⁶Coa ai jerepa oicohua'i de'o huesëhuë, iyere caëna. ⁷Nuñerepa mäsarute cayë. Yë'ëpi saquëna, jerepa de'oye pati'ñe pa'iohua'i a'ë, mäsaru. Yë'ëpi saima'quë pa'ito, mäsarute çocai cui'ne sihua ëaye joyona necaiquë daiye peoji. Yë'ëpi saisiquë pani jëjo daoye pa'iji, ite. ⁸Ipi daisi maca quëaja'quë api, co'ayere pa'i yo'oyë, caquë. Nuñerepa yo'oye pa'iji, quëasipi, cui'ne tayo yo'osicohua'ije sai de'huaye pa'iji quëasipi. ⁹Yë'ëre ire papi cajë cuasama' do'ire, tayo yo'ocohua'i pa'iyë. ¹⁰Nuñerepa de'o ma'are iñoja'quë api, yë'ëpi ja'quë quë'rona saisi do'ire, ja' maca mäsaru yë'ëre ña'ñe peoji. ¹¹Iye yeja cuañequëpi i tayo yo'o do'ire nejo cuañosiquë pa'i do'ire paipi asa ti'aja'cohua'i a'ë, Diusupi iohua'i tayo yo'o do'ire sai de'hua cuañeñe pa'iji, ca ja'ñere ipi quëaquëna.

12Ja yè'ta'ta jaiye mèsarute caye payè. Jaje pa'liquèta'are yure cato mèsaru asa tì'añere peoyè. 13Nuñerepa ca joyopi dani mèsarute ye'yaja'què api, si'aye nuñere pare. Coa ise'le cuasayere cama'è pasipi. Si'aye asase'ere casipi. Cui'ne mèsarute quèasipi, yequè mu'se tètò sai ja'ñere. 14Yè'ère de'loquère papi caja'què api, yè'è tse ayere paquèpi mèsarute quèa ññoja'què api. 15Si'aye ja'què paye yè'è tse a'è. Jaje pa'ina, cahuè. Yè'è tserè de'o joyo cato paja'què api. Jaje paquèpi yè'è tserè mèsarute se ññoja'què api.

Sihuayere Tìmè Cuãñoñe

16Èa maca cato, yè'ère ña'ne paja'cohua'i a'è, mèsaru. Pasicohua'ita'a ai tsoe maca pani ñaja'cohua'i a'è, yè'ère. Ja'què què'rona saiye, yè'è.”

17Ja maca i ye'yacohua'i acohua'ipi sa'ñe sei'è, ñeje cajè:

“¿Me caquè jaje caquè'ni? Èa maca cato yè'ère ña'ne paja'cohua'i a'è, cui'ne yequèje caji ai tsoe maca pani ña coja'cohua'i a'è, yè'ère. Ja'què què'rona saisi do'ire jaje pasipi caji. 18¿Iquere caquè jaje èa maca caquè'ni? Jaje cato me asa tì'añe'ni huesèyè, i caye.”

19Jaje yo'ojè cajèna, Jesús cato asapi, iohua'i seni asa'ñu'u cajè yo'oye. Jaje pa'ina, capi:

“Mèsarute cahuè, èa maca cato yè'ère ña'ne paja'cohua'i a'è, ai tsoe maca pani yè'ère ña coja'cohua'i a'è. ¿Ja case'ere mèsaru sa'ñe sejè yo'ojè caye? 20Nuñerepa mèsarute cayè. Mèsaru airepa oiija'cohua'i a'è, cui'ne co'a ju'lijè pa'ijja'cohua'i a'è. Jaje pa'ijjèta'are iye yeja pai cato sihuaja'cohua'i a'è. Jaje oijè pa'isicohua'ita'are mèsaru oise'epi yequè mu'se sihuaye ponèja'coa. 21Nomioi tsì coa huèosico pani ai yo'ocoo, tsìtu'ure pa maca tì'aèna, a'si ju'io. Jaje yo'osicota'a tsihua'è macare tè'ya dani a'sise'le huànèyecoa, huajè tsìtu'upi iye yejare pa'ina, sihuaco. 22Jaje cui'ne mèsarujè ai yo'oja'cohua'i a'è, yure cato. Jaje pa'iquèta'are yè'èpi co'ini mèsarute ña coja'què a'è. Ja maca mèsaru sihua huajèja'cohua'i a'è. Ja mèsaru sihuaye yecohua'ije jioye ti peoji.

23Ja mu'se cato yè'ère seni asaye ti peosipi. Nuñerepa mèsarute cayè. Ja'quèpi mèsarute isija'què api, si'aye mèsaru se'ne yè'è mamipi cajè sejèna. 24Iye macaja'a mèsaru yè'è mamipi cajè se'ne pahuè, yureta'a sejè'è. Sejèna, isija'què api. Isiquèna, sihuaja'cohua'i a'è.

Iye Yejare Ñese Quècoye

25Mèsarute cahuè. Iye coca pai yo'oye ayena conì cuècue ñaquè jaje casiquèta'are yequè mu'se tì'aja'coa, pai yo'oye ayena conì cuècuema'è caye, nuñerepa caja'què a'è, ja'què ayere tì'ña asayerèpa. 26Ja mu'se cato mèsaru yè'è mamipi cajè seja'cohua'i a'è. 27Tsoe ja'quèpi mèsarute oi paji, mèsarupi yè'ère oi do'ire cui'ne mèsarupi yè'ère Diusu què'ropi daisiquè api, cajè asa do'ire. 28Ja'què què'rore papi etani iye yejana daisiquè a'è. Jaje pa'iquèta'are yure cato iye yejapi jeoni ja'què què'rona col'ija'què a'è.”

29 Ja maca i ye'yacohua'ipi cahuë:

“Yureta'a mël'ë tĩñarepa cayë, yequena conì cuēcueye peoye. 30 Yureta'a mël'ëre ñajë cui'ne asayë, si'aye ta'ñe asaquëre papi. Jaje pa'ini yecohua'ijë mël'ëre seni asañu'u cajë yo'oye peoji. Jaje pa'ina, mël'ëre Diusu quë'ropi daisiquë api cajë asayë, yëquë.”

31 Cajëna, Jesupi capi:

“¿Jaje pa'ito yureta'a asa ti'are paye? 32 Tsoe ti'aji, iti yo'o maca. Yure iti macare pa'iyë, mësaru yël'ëre te'ire jëoni paì ñape hua saija'cohua'i a'ë. Ja maca te'i pëaja'quë a'ë. Jaje pëasiquëta'a te'i pa'iyë paja'quë a'ë. Yël'ë ja'quëpi yël'ë ja're conì pa'ija'quë api. 33 Iye cato cayë, mësarute yël'ë ja're conì pa'ijë ai yo'oye peoye de'oye pa'ijë'ë caquë. Iye yeja cato mësaru ai yo'oye pa'iji. Jaje pa'iquëta'are quëcoco'hua'i pa'ijë'ë. Yël'ë jë'quë iye yejare ñese quëcoquë paë'ë.”

Jesús I Ye'yacohua'ire Sëcacaie'e

17 1 Jaje ca tējini Jesús ma'tëmona ñaquë capi:

“Ja'quë tsoe ti'api, iti yo'o maca. Mël'ë mamaquëre de'oquëre papi ñocaijë'ë, mël'ë mamaquëpi mël'ëreje de'oquëre papi caquë ññoja'quëre. 2 Mël'ëpi mël'ë mamaquëre iye yeja paire cuañequëre nehuë, mël'ë isicohua'ire ti pani huesëye isijaquë caquë. 3 Mël'ëre te'i api Diusu asajë cui'ne mël'ë jëjo daosiquëre Jesucristore asaye a'ë, ti pani huesëye.

4 Iye yejare pa'i mël'ëre de'oquëre papi caquë ññoquë mël'ë cuañese'ere ne saohuë. 5 Iye yeja peo'në yël'ë mël'ë ja're pa'i de'oyere pare pase'ëje pa'ye yure yël'ëre isi cojë'ë, ja'quë.

6 Iye yeja acohua'ini mël'ë yël'ëre sahuani isisicohua'ire yël'ëpi mël'ë pa'iyere ñnohuë. Mël'ë tsecohua'i paë'ë. Jaje pa'iohua'ini yël'ëna mël'ëpi isina, iohua'ipi mël'ë cocare de'oye sehujë yo'ohuë. 7 Yure cato jaohua'i asayë, mël'ë tse a'ë cajë mël'ë yël'ëre isise'ere. 8 Jaje pa'ina, de'oye sehujë asahuë, mël'ë yël'ëre isisi coca. Asa ti'are pahuë, mël'ë quë'ropi daisiquë api cajë, cui'ne mël'ëpi jëjo daosiquë api cajë asahuë.

9 Jaohua'i do'ire caquë mël'ëre señë: Coa iye yeja acohua'ini caquë señe pañë. Mël'ë yël'ëre isisicohua'ini caquë señë, mël'ë tsecohua'ini. 10 Yël'ë paye mël'ë tse a'ë, cui'ne mël'ë payepi yël'ë tse a'ë. Jaje pa'ina, yël'ë de'oyere jaohua'ipi ññoñë.

11 Yël'ë iye yejare pa'iyë paja'quë a'ë. Paquëta'are jaohua'ita'a iye yejare pa'ija'cohua'i a'ë. Yël'ë cato saiye, mël'ë ja're pa'ija'quëpi. Ja'quë de'oquërepa jaohua'i mañare ñacaijë'ë, mël'ë tutupi mël'ë yël'ëre isisicohua'ire, mël'ë cui'ne yël'ë conì pa'iyëje pa'ye tel'ije pa'iohua'i pa'ija'cohua'ire. 12 Yël'ë iye yeja pa'i maca mël'ë tutupi de'oye ñacaë'ë, iohua'ire, mël'ë yël'ëre isisicohua'ire. Ñacaina, tel'ije ne huesëye papi, noni ne huesësiquëse'e ne huesëpi toyase'epi ti'acquëna.

13 Yure cato mël'ë pa'i hue'ñana saiye. Jaje pa'iquëta'are yël'ë ja yël'ta'a iye yejare pa'i do'ire cayë, iye coca, jaohua'ijë yël'ë sihuayeje pa'ye sihuajajë

caquë. ¹⁴Më'ë cocare jaohua'ina isihuë. Isina, iye yeja acohua'ipi iohua'ire coeyë, iye yeja acohua'li peo do'ire. Yë'ëje iye yeja aquë peoyë. ¹⁵Iye yejapi jaohua'ire etoni sajë'ë caquë se'ne pa'ñë. Yë'ë cato se'ñë, më'ëpi ñacaina, huatipi josa yo'oye pajaquë caquë. ¹⁶Jaohua'li cato iye yeja acohua'li peoyë. Yë'ëje iye yeja aquë peoyë. ¹⁷Më'ë tsecohua'irepa pa'ija'cohua'ire de'ocohua'ire pare nejë'ë, më'ë cocapi. Më'ë coca cato nu'ere pa'ë. ¹⁸Më'ë yë'ëre iye yejana jëjo daose'ëje pa'ye cui'ne yë'ëje jaohua'ire iye yejana jëjo saoyë. ¹⁹Jaje pa'ina, jaohua'ini caquë yë'ëpi më'ëna isiyë, jaohua'ijë nu'erepa coca do'ipi më'ëna isisicohua'li pa'ijë më'ë yëyere yo'ojajë caquë.

²⁰Jaohua'ise'ere caquë secacaiye pa'ñë, cui'ne iohua'li quëajëna, jeteyo'je asani itire pa'ë cajë cuasaja'cohua'ireje caquë secacaiyë. ²¹Si'aohua'li jaohua'ijë te'ijë pa'iohua'li pa'ijajë caquë se'ñë, te'ijë pa'iohua'li maina tsioni pa'ijaquë caquë. Ja'quë, yë'ë cui'ne më'ë coní tsioni te'ijë pa'iohua'li pa'iyëje pa'ye pa'ijajë jaohua'ijë. Jaje tsiosicohua'ipi te'ijë pa'iohua'li pa'ijëna, iye yeja acohua'ipi ñajë më'ëpi yë'ëre jëjo daopi cajë sehuoja'cohua'ire. ²²Jaohua'ire isihuë, de'oyere pare më'ë yë'ëre isise'ere, te'ijë pa'iohua'li pa'ijajë caquë, më'ë cui'ne yë'ë te'ijë pa'iohua'li pa'iyëje cui'ne pa'ijajë caquë. ²³Yë'ëpi iohua'li ja're coní pasi'li. Pa'ina, më'ëpi yë'ë ja're coní pa'ijë'ë. Pa'ina, iohua'ipi te'ijë pa'iohua'irepa pa'ija'cohua'ire. Jaje pa'ijëna, iye yeja pa'ipi, më'ëpi yë'ëre jëjo daopi cajë asaja'cohua'li a'ë, më'ëpi jaohua'ire yë'ëre oiyëje pa'ye oina ñajë.

²⁴Ja'quë më'ëpi yë'ëre isihuë. Jaje pa'ina, më'ëre se'ñë, jaohua'ijë yë'ë pa'li hue'ñare pa'ijajë caquë, pa'ijë më'ë yë'ëre de'oyerepa isise'ere ñajajë. Yë'ëre më'ë cato ai oiquë a'ë, ja yë'ta'a yeja de'huama'nëpi. ²⁵Yë'ë ja'quë nu'erepa yo'oque, më'ëre iye yeja pai asa ti'a'ne pa'ñë. Jaje pa'iquëta'are yë'ë cato më'ëre asayë icohua'ijë më'ë jëjo daosiquë api cajë asayë, yë'ëre. ²⁶Yë'ëpi iñohuë, më'ë pa'iyë jaohua'ire. Ja yë'ta'api iñoquë pasi'li, ai jerepa ti'ña. Jaje iñoquëna, më'ë yë'ëre oiyepi iohua'ini pa'ijaquë pa'ina, yë'ëpi iohua'li ja're coní pasi'li."

Jesure Tseani Sase'e

(Mt. 26.47-56; Mr. 14.43-50; Lc. 22.47-53)

18 ¹Iye ca tējini jeteyo'je Jesús saji'li, i ye'yacohua'li ja're coní Cedrón a'ri tsiaya je te'tena. Jarote a'ri tsio paji'li. Jarona Jesús i ye'yacohua'li ja're coní cacapi. ²Judasje, coso yehuoja'quëje jaro ñaquë paji'li. Jarona Jesús si'anë i ye'yacohua'li ja're tsis'i hue'ña paji'li. ³Pa'ina, Judas iti ñaquë sète iti hue'ñana sa ti'api, soldado pai ja're, cui'ne Maija'quë hue'ë ñacaicohua'li ëjaohua'li jëjo daocohua'li ja're, cui'ne fariseo pai jëjo daocohua'li ja're. Maija'quë hue'ë ñacaicohua'li ëjaohua'li jëjo daocohua'li cato Maija'quë hue'ë ñacai soldado pai pa'ë. Si'aohua'li huajo cui'ñasicohua'ire papi da'ë, toa tsëopëana cui'ne soquë pena tsëosicohua'ipi. ⁴Jesupi iohua'li yo'o ja'ñe asaquë du'ru sani iohua'ire seji'li:

“¿Neni co'eye'ni?”

⁵Caquëna, ìohua'ipi cahuë:
 “Jesús Nazaret aquëni co'eyë.”
 Cajëna, Jesupi sehuoquë capi:
 “Yë'ë ì a'ë.”

Judasjë ìohua'i ja're conì paji'i. ⁶Jaje caquëna, asani co'ye jëa saoni vejana tata omehuë. ⁷Ja maca Jesús tijupë seji'i, ìohua'ire cahuë:
 “¿Neni co'eye'ni?”

Caquëna, ìohua'ipi cahuë:
 “Jesús Nazaret aquëni co'eyë.”
⁸Cajëna, Jesús capi, ìohua'ire:

“Tsoe mësarupi asahuë. Yë'ë ì a'ë. Yë'ëni co'eye sëte jaohua'ire josa yo'oma'pë pa'ijë'ë, ìohua'ise'e saijajë.”

⁹Jaje Jesús case'e ti'api, ì case'e cato caji:

“Më'ë yë'ëre ìsìsìcohua'ire ne huesoye pa'huë, te'ireje.” ¹⁰Ja maca Simón Pedropi ì hua'ti dutani ëja të'hui cajorose'e tëto huatopi. Ì tëtosiquë cato Maija'quë huë'e ñacaìcohua'i ëjaëre necaiquë paji'i. Ì mami cato Malco hue'equë paji'i. ¹¹Jaje yo'oquëna, Jesupi Pedrore capi:

“Hua'tire jo ju'i hue'ñana jua nëojë'ë. Iye jare jaje ai yo'oye pa'iji, yë'ë ja'quëpi ìsìto.”

Maija'quë Huë'e Ñacaìcohua'i Èjaërepa Quë'rona Èjaë Jesure Sase'e
(Mt. 26.57-58; Mr. 14.53-54; Lc. 22.54)

¹²Ja maca soldado pai cui'ne ìohua'i ëjaë conì, cui'ne judío pai soldado conì Jesure tseani huehuë. ¹³Ja jeteyo'je Anás huë'ena sahuë. Anás mamacorepa do'ire Caifás cato Anás huau paji'i. Jaëpi ja tëcahuë cato Maija'quë huë'e ñacaìcohua'i ëjaë paji'i. ¹⁴Jare iquë Caifáspi ca nëopi, judío paire te'i mai aquëpi jucacaiye pa'iji, si'a judío pai do'ire.

Pedropi Jesure Ñama'quë A'ë Case'e
(Mt. 26.69-70; Mr. 14.66-68; Lc. 22.55-57)

¹⁵Simón Pedro cui'ne yequë ì ye'yequë conì tuë'ë, Jesure. Jesús ye'yaquë cato Maija'quë huë'e ñacaìcohua'i ëjaë ñaquë paji'i. Jaje pa'i do'ire cacapi, Jesús ja're conì, ëjaë huë'e hue'se daripëna. ¹⁶Jaje pa'iquëta'are Pedrose'e hue'se eta sa'rona pëapi. Jaje pëaëna, Maija'quë huë'e ñacaìcohua'i ëjaë ñaquëpi Jesús ye'yaquëpi etani eta sa'ro ñacore coca canì Pedrore copi, sa'nahuëna. ¹⁷Ja maca eta sa'ro ñacopi Pedrore seco'ë:

“¿Më'ë ì ye'yacohua'i aquë pa'ima'quë?”

Sëona, Pedropi capi:
 “Pajë'ë, yequë a'ë.”

¹⁸Ai sësëye sëte, jo'yaohua'i cui'ne policia pai conì jeca dani suani toa nehuë. Neni jarote ñul'ijë sësëquëna, cuijë pa'ë'ë. Pedroje jarote paji'i, sësëquëna, cuiquë.

Maija'quë Huë'e Ñacaicohua'i Ējaëpi Jesure Sese'e
(Mt. 26.59-66; Mr. 14.55-64; Lc. 22.66-71)

¹⁹Maija'quë huë'e ñacaicohua'i ějaëpi Jesure se huëopi, jecohua'i a'ni, më'ë ye'yacohua'i caquë, cui'ne iquere më'ë ye'yaquë paquë'ni caquë seji'i. ²⁰Seina, Jesupi capi:

“Si'a paì asajëna, yë'ë cato casiquë a'ë. Si'anë paì tsi'si sitona ye'yaquë pa'isiquë a'ë. Cui'ne Maija'quë huë'ena ye'yaquë pa'isiquë a'ë, judío paì tsi'si hue'ñana. Yë'ë cato yo'osiquë a'ë, yahue yo'oma'ë pa'isiquë a'ë. ²¹¿Me yo'oquë yë'ëre seni asaquë'ni? Seni asajë'ë, yë'ë caquëna, asasicohua'ini, jaohua'ipi quëajajë yë'ë case'e. Jaohua'ipi asayë, yë'ë case'e si'aye.”

²²Jaje Jesús ca maca Maija'quë huë'e ñacai policiapi ìti maca nëcaquëpi tsiana tëttoquë capi:

“¿Jaje io Maija'quë huë'e ñacaicohua'i ějaëre sañope sehuocoa?”

²³Caquëna, Jesupi capi:

“Quëajë'ë. ¿Iquere yë'ë co'aye care'ni? ¿Yë'ë case'epi de'oye pa'ito me yo'oquë tël'caquë'ni, yë'ëre?”

²⁴Ja maca Anáspi Maija'quë huë'e ñacaicohua'i ějaë Caifás quë'rona sëasiquëni jëjo saopi.

Pedropi Jesure Ñama'quë A'ë, Ca Cose'e
(Mt. 26.71-75; Mr. 14.69-72; Lc. 22.58-62)

²⁵Pedro jaje yo'o maca cato toare cui nëcapi. Nëcaquëna, ìte cahuë:

“¿Më'ëje ì ye'yacohua'i aquë pa'ima'quë?”

Cajëna, Pedropi cosoquë capi:

“Pajë'ë. Ñama'quë a'ë, ìte.”

²⁶Ja maca Maija'quë huë'e ñacaicohua'i ějaëre necaicohua'i aquëpi seji'i, Pedro cajoro tëtto tëasiquë, do'iquëpi ñeje caquë:

“¿Më'ëje pa'ini yë'ë ñasiquëta'a jeto tsio?”

²⁷Caquëna, Pedropi tijupë cosopi. Coso macarepa curaje yëji'i.

Pilato Ña Hue'ñare Jesús Pa'ise'e
(Mt. 27.1-2, 11-14; Mr. 15.1-5; Lc. 23.1-5)

²⁸Ja maca Caifás huë'epi Jesure Pilato huë'ena sahuë. Ja maca cato ñata tome huesë maca paji'i. Judío cato cacama'pë pa'ë huë'e, si'si neñere coejë, ìohua'ipi jarona cacasicohua'i pani Egítopi Israel paì etajë pa'ise'ere cuasajë añere para'huë. ²⁹Jaje pa'ina, Pilatopi etani ìohua'ire capi:

“¿Ique do'ire iquere sañope caye'ni?”

³⁰Caquëna, ìohua'ipi sehuohuë. Do'i quë'i peoto yëquë më'ë quë'rona daye para'huë.

³¹Ja maca Pilatopi capi:

“Sajë'ë, iquere. Sani mësaruru cuañese'e pa'iyeye do'i quë'i pa'ito yo'ojë'ë.”

Caquëna, judío paipi cahuë:

“Jaje pa'iquëta'are yëquë judío pai cato paire huani jeoñe cuañeñe ti peoyë.”

32 Jaje yo'ojëna, Jesús i ju'i ja'ñe ca nëose'e tì'api. 33 Pilato cui'naëpi i huë'ena cacani Jesure soini seji'i:

“¿Më'ë judío pai ëjaëre paë?”

34 Caquëna, Jesupi capi:

“¿Më'ëse'e cuasaquë caquë, panita'a yecohua'ipi carena, caquë?”

35 Caquëna, Pilatopi sehuopi:

“¿Judíoje ñani yë'ë cato? Më'ë paipi cui'ne Maija'quë huë'e ñacaicohua'i ëjaohua'ipi yë'ëna dani isihuë, më'ëre ja do'ire cayë. ¿Iquere yo'o u'ni?”

36 Caquëna, Jesupi sehuopi:

“Iye yeja yë'ë cuañe hue'ña peoji. Iye yeja yë'ë quë'ro pa'ito, yë'ë tē'te pa'icohua'ipi uihuara'huë, yë'ëpi judío pa'ini tsea cuañoñe pajajë cajë. Yë'ë cuañe hue'ña peoji, iño.”

37 Ja maca Pilatopi capi:

“Jaje pa'ito judío pai ëjaë, më'ë.”

Caquëna, Jesupi capi:

“Pai ëjaë'ë, më'ë cayeje. Peosiquëpi pai de'oni yë'ë cato iye vejana daisiquë a'ë, nuñerepa cocare casi'i caquë. Nuñerepa cocare sehuocaicohua'ipi yë'ë caye asacayë.”

Jesure Huani Jëoñe

(Mt. 27.15-31; Mr. 15.6-20; Lc. 23.13-25)

38 Caquëna, Pilatopi capi:

“¿Ique a'ni, nuñerepa?”

Jaje seni tējini, Pilato tijupë pai ja're coca casi'i caquë, etani capi:

“I co'aye yo'ose'e yë'ë tì'ama'ë pa'iyë, iquëre. 39 Mësaru cato Egítopi Israel pai etajë pa'ise'ere cuasajë yo'o mu'seña tseasicohua'ire te'ire etocohua'i a'ë.

¿Jaje pa'iyë sëte mësaru neni etoye yëye'ni? ¿Judío pai ëjaëni etoye?”

40 Jaje ca maca si'a pai cui coreña:

“¡Jaëre cato etoye peoji! Barrabásni eto saojë'ë.”

Iquë Barrabás cato co'amaña yahue imaquë pajil'i.

19 1 Jaje cajëna, asani Pilatopi Jesure si'sejë'ë caëna, si'sehuë.

2 Soldado pai Jesure miupi maro tëosicopi siopëna puahuë. Cui'ne nea maja'i ju'i care Jesure suñacaë'ë. 3 Ja jeteyo'je i quë'rona tsiojajë cahuë:

“¡Judío pai ëjaëre pa'ë, më'ë!”

Jaje cajë tsiana tē'cahuë.

4 Tijupë Pilato eta conì capi:

“Asajë'ë. Iquë co'aye yo'ose'e tì'ama'ë pa'iyë. Cui'naëni mësaru quë'rona da coñë, do'i peoquë api cajë ñajajë caquë.”

5 Jesupi miu maro pu'i cui'ne nea maja'i ju'i ca ju'i etaquëna, ja maca Pilatopi capi:

“¡Ñajë'è. Ìnore pa'iji, iquè!”

6Maija'quë huè'e ñacaicohua'i ëjaohua'i cui'ne policia paì ñani cuihuè:

“¡Queñe pa'iji. Queñe pa'iji!”

Jaje cuijèna, Pilatopi capi:

“Sani quejè'è, mësarupi. Yè'è cato tì'añe pahuè, ì co'aye yo'ose'e.”

7Caquèna, judío paipi sehuohuè:

“Yèquë cuañese'e payè. Jaje pa'ina, yèquë cuañese'eje ju'ìne pa'iji,

Diusu mamaquë a'è casi do'ire.”

8Jare Pilato asani ai jerepa ca'rapì. 9Ja maca cui'naëpi huè'ena cacani seji'i, Jesure:

“¿Jero aquè a'ni, mè'è caquè?”

Seina, Jesús ti sehuoma'è paji'i, te'o macareje.

10Ja maca Pilato capi:

“¿Yè'ère sehuocaiye paquè? ¿Huesèquë cui'ne yè'èpi mè'ère queja'a tutu cui'ne mè'ère eto sao tutuje paye?”

11Caquèna, Jesupi capi:

“Diusupi mè'ère ja tutu isima'quë pa'ito mè'è yè'ère yo'o tì'añe ti peora'pi. Jaje pa'ina, yè'ère tseani mè'èna isisiquèpi mè'è jerepa jai do'ì paji, tayo do'ire.”

12Jare ja macapi Pilato cato Jesure eto sao huasosi'i caquè co'epi.

Co'equèta'are judío paipi jerepa cuihuè, ñeje:

“Jaèni eto saquè pani César cajei peoja'quë a'è, mè'è. ¡Paì ëjaère pa'è caquè yo'oquë cato César te sañope yo'oquë api!”

13Ja maca Pilato iyere asani Jesure hue'sena etoni paì yo'ose'e ne de'huaquë ña de'hua hue'ñana ja'ruripi, hebreo paì coca cato Gabata hue'yo hue'ñana. Jaje canì cayè, “Quènapì nesico”. 14Ja yè'ta'a Egítopi Israel paì etajè pa'ise'ere cuasajè yo'o mu'se tì'añe pa maca mu'se joporepa pa'ina, yo'ohuè, te'e mu'se caraquèna. Ja maca judío paìre Pilatopi capi:

“¡Iquë mësaru ëjaèrepa pajè'è!”

15Jaje caquèna, iohua'ipi cahuè:

“¡Ju'ìjaquë, ju'ìjaquè! ¡Queñe pa'iji!”

Cajèna, Pilatopi capi:

“¿Yè'èpi mësaru ëjaère queja'quë a'ni, jaje ca ja'ñe?”

Caquèna, Maija'quë huè'e ñacaicohua'i ëjaohua'ipi cahuè, ite:

“Yequë ëjaère pare peoyè. Coa Césarse'e yèquë ëjaè pa'iji.”

16Jaje ca tējini Pilatopi Jesure iohua'ina isipi quejajè caquë. Isina, iohua'ipi sahuè.

Jesure Queñe

(Mt. 27.32-44; Mr. 15.21-32; Lc. 23.26-43)

17Jesús jaropi etani ite queja'a sarahua coani saji'i, paì siopè tara hue'e hue'ñana hebreo paì coca cato Gólgota hue'yo hue'ñana. 18Jarona ite quehuè. Yecohua'ire cayaohua'ire ì ja're conì quehuè. Jesuni jopore pana nëcojè

yecohua'ini i ĩja te'tena cui'ne i ari te'tena nĕcohuĕ. ¹⁹Pilatopi cuañepi cruzu ĩmĕje'ena: JESÚS NAZARET AQUĒ JUDÍO PAI ĒJAĒPI toyasicore deojĕ'ĕ caquĕ. ²⁰Jaje toyasicore jai pai judío pai ñahuĕ, Jesure que sitopi pai daripĕ ja'yere pa'i do'ire. Toyasico cato paji'i, hebreo coca, griego coca, cui'ne latín coca. ²¹Jaje pa'ina, Maija'quĕ huĕ'e ñacaicohua'i ĩjaohua'i judío paipi cahuĕ, Pilatore:

“Toyama'ĕ pa'ijĕ'ĕ ‘Judío pai ĩjaĕpi’ caquĕ coa toyajĕ'ĕ, ñeje, ‘Judío pai ĩjaĕ'ĕ caquĕ api.’ Jare toyajĕ'ĕ.”

²²Cajĕna, Pilatopi sehuopi:

“Yĕ'ĕ toya huesosico cato jaje pa'iji. Yeque ponañe peoji.”

²³Ite quĕsi jeteyo'je soldado paipi Jesús ju'i care ĩni cajese'le pa'i caña huahuehuĕ, pai ñape cui'na ja'yese'le. Cui'ne camisajĕ ĩ'ĕ, ĩtena te'opi tsoa ca pa'ie sĕte, ²⁴sa'ñe ĩohua'i cahuĕ:

“Nanĕ ye'saye pañu'u, coa ĩti de'hue nesiquĕpi ĩote paja'quĕre.”

Jaje cajĕ yo'o maca tsoe tĭ'api, toyase'le ñeje cayepi:

“Yĕ'ĕ ju'i care pai ñape huahuehuĕ. Nepi paja'cohua'i a'ni, cajĕ.” Jaje soldado pai yo'ohuĕ, ĩti case'eje pa'ye.

²⁵Cruz yĕ'quĕ macare Jesús pĕca ja'co cui'ne ĩo maja'yo, cui'ne Cleofas nĕjo María, cui'ne yequĕ María Magdalena paĕ'ĕ. ²⁶Pa'ijĕna, pĕca ja'core Jesús ñani, cui'ne i ai oi ye'yaquĕ pa'isiquĕpi ĩo yĕ'quĕ macare nĕcaquĕna, ñani capi:

“Nomio jaĕ api, mĕ'ĕ mamaquĕ.”

²⁷Ja jeteyo'je i ye'yaquĕre capi:

“Jao, mĕ'ĕ ja'co.”

Jare ĩti casi macapi i ye'yaquĕpi i huĕ'ena sai sapi, ĩote.

Jesús Ju'ise'e

(Mt. 27.45-56; Mr. 15.33-41; Lc. 23.44-49)

²⁸Ja jeteyo'je Jesús tsoe si'aye ne saose'le sĕte toyase'le cayepi tĭ'ajaquĕ caquĕ capi:

“Oco ĕaji.”

²⁹Jarote o'sa cono tĭmĕsicopi ñuco'ĕ. Ñu'iona, ja maca ca'cona saĕni soquĕ tarapĕna huĕni i yĕ'opona ucujaquĕ cajĕ yo'ojĕna. ³⁰Jesupi o'sa cuiya'i conore ucupi. Ucuni capi:

“Si'aye tĭ'api, yureta'a.”

Jaje cani meñe sĭopĕ ne meni, juni huesĕpi.

Jesús Coripa Quĕ'rona Soldadopi Totase'e

³¹Ja yĕ'ta'a Egĭptopi Israel pai etajĕ pa'ise'ere cuasajĕ yo'o mu'se tĭ'ama'ĕ paji'i. Ja mu'se cato huajĕ mu'se paji'i. Jaje pa'i do'ire co'aye cruzure ju'isicohua'ipi dete ma'ñe cajĕ Pilatore seil'ĕ, quĕsicohua'ire quĕñase'le tĕ'ca jĕ'yeni tĭona sajjajĕ cajĕ. ³²Ja maca soldado paipi sani

du'ru aquëre pani quëña të'ca jè'yehuë, cui'ne yequëreje të'ca jè'yehuë, Jesús ja're quesicohua'ire. ³³Jaje yo'oni Jesús quë'rona sa tsiojajijë ñajëna, tsoe ju'isiquë paji'i. Pa'ina, ña jujani quëña të'ca jè'yeye pahüë.

³⁴Jaje pa'iquëta'are soldadopì uiyopi totapi. Coripana totaquëna, tsie cui'ne oco etapi. ³⁵Iye quëaquë cato itì ñasiquëpi quëaji cui'ne nuñerepa caji. Nuñerepa quëaji itì asasiquëpi, mësarureje care paji cajë asajajë caquë. ³⁶Iye cato yo'ohuë, ñeje toyase'epi tì'ajaquë cajë, itìpi caji: "Ì quëña të'ca jè'yeye paja'cohua'i a'ë." ³⁷Yequë hue'ña toyase'epi caji: "Ìohua'i a'si nesiquëni ñaja'cohua'i a'ë."

Jesure Tàse'e

(Mt. 27.57-61; Mr. 15.42-47; Lc. 23.50-56)

³⁸Jà jeteyo'je José, Arimatea aquëpi Pilatore sani Jesús capë tasi'i caquë seji'i. José cato judío pàini ca'raquë Jesure yahurepa tuiquë paji'i. Jaje pa'ipi seji'i, Pilatore Jesús capë sani tasi'i caquë. Caquëna, Pilatopi de'oji sajë'ë. Caëna, sani Jesús capë ñni sapi. ³⁹Cui'ne Nicodemoje saji'i, treinta kilos mirra cui'ne aloes co'mese'ere saquë. Jäë cato Jesure ñami sani coca casiquë paji'i. ⁴⁰Jaje José cui'ne Nicodemo conì saiscohua'ipi Jesús capëre ñni ñohua'i sase'e huëo sënëpi cañana neni tunahuë, ju'isiquëre. Taja'quëre judío pai yo'oyepi yo'ohuë, jaje yo'ocohua'i sète. ⁴¹Jesure que sito ja'yere tsio paji'i. Pa'ina, ja tsiore paji'i, huajë quë'isi coje paire tama'coje. ⁴²Pa'ina, ja cojena Jesure tãhuë, ja'ye maca pa'licona. Jà maca cato judío pai huajë mu'se tsoe tì'a huëopi.

Jesús Ju'isiquëpi Huëiye

(Mt. 28.1-10; Mr. 16.1-8; Lc. 24.1-12)

20 ¹Du'ru co'amaña ne mu'se ñata maca ja neaquëna, María Magdalenapi saco'ë, tasi daripëna. Saio ñacona, daripë siosicopi jai quëna pë hui'yosico paji'i. ²Jà maca Simón Pedro quë'rona cui'ne Jesús ai oiquërepa pa'isiquë quë'rona huë'huëni cao:

"Ëjaë capë tsoe sahuë, daripë pa'isicore. Huesëyë, jero sa'na nehuë."

³Jaje cacona, Pedro cui'ne yequë ñ yel'yaquë conì daripë quë'rona ñañu'u cajë saë'ë. ⁴Cayahua'i te'e co'arepa huë'huëjë saë'ë. Te'i ai jerepa huë'huësiquëpi du'ru tì'api, tasi daripëna. Pedropi jeteyo'je tì'api. ⁵Du'ru tì'ani në meni ñaquëna, coa ite huëni oasi cañase'e paji'i. Cacani ñañeta'a papi. ⁶Paquëna, Simón Pedropi jeteyo'je daisiquëpi daripëna cacapi. Jäëje cui'ne ñapi, ite huëni oasi cañase'e pa'ina. ⁷Cui'ne yequeje ñapi, Jesús siopë tunasi capi tìrona iose'ere tunani yequë caña uimal'tona oasicopi pa'iona. ⁸Jà maca cui'ne du'ru daripëna tì'asiquëje cacani itì yo'ose'e ñaquë nuñerepa asapi, itì yo'ose'e. ⁹Jesucristo ju'isiquëpi huëi ja'ñere case'ere ja yë'ta'a toyase'e caye asa tì'lama'cohua'i sète. ¹⁰Jaje ña tējini ñ yel'yacohua'i col'ihuë, huë'lena.

Jesupi María Magdalenana Ñaise'e
(Mr. 16.9-11)

11 Jaje pa'iquëta'are María cato hue'sena pëa nëcani oi nëcao, daripë yë'quë macapí. Jä oio se në meni ñao daripë sa'nahuëna. 12 Ñacopi ñao, cayahua'i poja'i ju'i caña suñasicohua'ipi, Jesús capë pa'i sitore pa'ijëna, te'i quëo pa'i sitore pa'ina, yequëpi siopë pa'i sitore ñu'ina. 13 Jä maca huiñaohua'ipi iote sei'ë:

“¿Nomio, iquere oico'ni?”

Cajëna, iopi sehuro:

“Yë'ë Èjaëni sahuë. Jä do'ire oiyë. Huesëyë, jero sa'na sani nehuë.”

14 Jaje se ca toco, se ponëco Jesure ñao, iti macare nëcaquëna. Ñacota'a Jesupi cuasaye pao. 15 Jä maca Jesupi iote seji'i:

“¿Nomio, iquere oico'ni? ¿Neni co'eco'ni?”

Caquëna, iti maca tsio ñaquë api cuasaco cao:

“Èjaë, më'ëpi sasiquë pani quëajë'ë, më'ë ne sito. Quëaëna, yë'ëpi ite sasi'i.”

16 Jä maca Jesupi capi, iote:

“¡María!”

Caquëna, iopi ponëni cao, hebreo cocapi:

“¡Raboni!” Jaje caye cato cao, ye'yaquë.

17 Jä maca Jesupi capi:

“Tseama'o, ñu'ijë'ë. Jä yë'ta'a ja'quë quë'ro saima'quë a'ë. Jaje pa'iquëta'are sani quëajë'ë, yë'ë yo'je tsire. Pëca ja'quë quë'rona cui'ne mai Diosu quë'rona saiyë.”

18 Caquëna, jä maca María Magdalenapi sani i ye'yaquë pa'isicohua'ire quëao. Èjaëni ñahuë, caco. Ipi jaje quëajë'ë, caëna, cayë, cao.

Jesupi I Ye'yacohua'ina Ñaise'e
(Mt. 28.16-20; Mr. 16.14-18; Lc. 24.36-49)

19 Jare jä mu'se du'ru colamaña ne mu'se ñami pa'i maca i ye'yacohua'ipi tu'rihuëna judío paini ca'rajë cacani eta sa'ro siosicohua'ipi paë'ë. Pa'ijëna, Jesupi iohua'i jopona ñaiquë pëpaquë capi:

“De'oye pa'ijë'ë.”

20 Jä se ca tëjini i jëña cui'ne i coripa iñopi. Jä maca Èjaëre papi cuasajë sihuahuë. 21 Jä maca cui'naëpi Jesús ca copi:

“De'oye pa'ijë'ë, mësarü. Ja'quë yë'ëre jëjo daose'eje cui'ne yë'ëje mësaruteje jëjo saoyë.”

22 Jaje cani sëcopi iohua'ina, sëcoquë capi:

“De'o joyore pare pajë'ë. 23 Mësarupi sai de'huacaicohua'ini iohua'i tayo yo'ose'e sai de'huacaiye pa'iji. Mësarü sai de'huacaima'cohua'ini iohua'i tayo yo'ose'e sai de'huacaiye peoji.”

Tomáspi Jesús Huëisiquère Ñase'e

²⁴Tomás Jesús doce soisicohua'i aquëpi cui'ne yequë mami Gemelo hue'equëpi Jesús ñai maca peopi. Peoquëna, yecohua'ise'e paë'ë. ²⁵Peoquëna, ñasicohua'ipi Jesús ye'yacohua'ipi quëahuë, Ëjaëni yëquë ñahuë cajë. Cajëna, Tomáspi capi:

“Yë'ëpi i jëtë quëna ñaca cojena cui'ne i coripa ui cojena yë'ë jëtëpi sani ñama'ë pani ire papi caye paja'quë a'ë.”

²⁶Ocho mu'seña tëto saisi maca i ye'yacohua'ipi huë'ena tsi'sicohua'ipi paë'ë. Pa'ijëna, jarote Tomásje coní paji'i, yure cato. Ja maca Jesús ñai, eta sa'noa sïose'epi pa'iquëta'are. Ja maca pëpaquë capi:

“De'oye pa'ijë'ë.”

²⁷Ja maca capi, Tomásre:

“Më'ë jëtëpi ñnona sa'ijë'ë. Sa'i ñajë'ë, yë'ë jëñare. Më'ë jëtëre dajë'ë. Dani yë'ë coripa ui cojena sa'ijë'ë, tsoerepa jëa coema'ë pa'ija'quë nuñere pa'ë caquë asaja'quë.”

²⁸Ja maca Tomáspi sehuopi:

“Yë'ë jëjaë cui'ne yë'ë Diosu!”

²⁹Caquëna, Jesupi capi:

“Tomás yureta'a asare payë, më'ë yë'ëre ñasi do'ire. Sihuayë, yë'ëre ñama'cohua'ipi coa quëayena asani nuñere pa'ë cajë cuasacohua'ire.”

Me Neja'copi Iye Toya Pëpë Pa'ico'ni

³⁰Jesús jaiye yo'opi i ye'yacohua'i ñajëna, pai yo'o tì'a ma'ñere ja yo'ose'e toya pëpëna si'aye toyase'e peoji. ³¹Ja je pa'iquëta'are iye cato mësarupi Jesure ire papi Cristo huasoquë api, cajë cui'ne Diosu mamaquëre papi cajë asani ti pa'iyere tì'ajajë cajë toyase'e a'ë.

Jesupi Siete I Ye'yacohua'ina Ñaise'e

21 ¹Ja jeteyo'je Jesús tijupë i ye'yacohua'ina ñai, Tiberias jaira tëtëpana. Ñaini ñeje yo'opi: ²Simón Pedropi cui'ne Tomás Gemelo hue'equë cui'ne Natanael Caná yeja Galilea aquë cui'ne Zebedeo mamajë cui'ne cayaohua'i Jesús ye'yacohua'i coní paë'ë. ³Pa'ijëna, Pedropi capi:

“Hua'ire sani nesi'i.”

Caquëna, yecohua'ije cahuë:

“Yëquëje më'ë ja're sañu'u.”

Cani saë'ë, te'e i ja're coní yohuëna aya mëni. Ja ñami hua'ire neñe pahüë. ⁴Ñata tome maca Jesús tsiaya tëtëpare nëcapi, i ye'yacohua'ipi huesëhuë, iquei'ni cajë. ⁵Ja maca capi, Jesupi:

“¿Tsidohuë, hua'i neñe pare'?”

Caquëna, iohua'ipi cahuë:

“Pahüë, neñe.”

⁶Ja maca Jesús capi:

“Yohuë ëja te'tena hua'li yo'ecore jeo dëojj'ë. Ja maca mësarü neja'cohua'i a'ë.”

Caëna, i case'ejë jeo dëohuë. Jeo dëorena, hua'ipi tımëni dëquëcona, naë tı'añe pa_huë. 7 Ja maca Jesús ai yëquëpi Pedrore capi:

“iMai Ëjaëre papi!”

Jaje ca macarepa asayepi Simón Pedropi i ëmëje ju'icore se suñani sa duji'i, tsiayana. 8 Yecohua'i cato yohuëja'a tsio daë'ë, mejahuëna, hua'li yo'erë naëjë. Coa cien metro paji'i, tëtëpa tı'añe. 9 Yejana tıtani tumajë tı'ahuë, tsoe toa suasicopi pa'ina. Cui'ne hua'li, pan paji'i, toa ëmëje'na tunase'epi. 10 Ja maca Jesupi capi:

“Dajj'ë, hua'ire mësarü nesicohua'ini.”

11 Simón Pedropi yohuëna aya mëni hua'li yo'ecore cutihuëre pana naë mapi, mejahuëna hua'li tımësiconi. Ciento cincuenta y tres hua'ire nehuë. Jaje pa'iquëta'are hua'li yo'erë tëiye pa_o. 12 Ja maca Jesupi capi:

“Dani hua'li aijj'ë.”

Te'ijë ite iquei'ni, më'ë caquë señe papi. Si'aohua'i Ëjaëre papi cajë asahuë. 13 Ja jeteyo'je Jesupi panpë ini hua'quequë aopi si'aohua'ire, cui'ne hua'irejë hua'quequë aopi.

14 Iye cato toasoñe aco paji'i, iohua'li ite ñase'e ju'isiquëpi huëisiquëre.

Simón Pedrore Jesús Case'e

15 Ao ani tējisi jeteyo'je Jesupi seji'i, Pedrore ñeje:

“Simón Jonás mamaquë, ¿iye jerepa më'ë yë'ëre oiquë?”

Caquëna, Pedropi sehuopi:

“Jaje pa'ijj'ë, Ëjaë. Më'ëpi tsoe asayë, yë'ë më'ëre oiye.”

Caquëna, Jesupi capi:

“Jaje pa'ito yë'ë yëi ñamare de'oye ñacaij'ë.”

16 Tıjupë seni copı, cayaye acore:

“Simón Jonás mamaquë, ¿yë'ëre oiquë?”

Caquëna, Pedropi sehuopi:

“Jaje pa'iji, Ëjaë. Më'ëpi tsoe asayë, yë'ë më'ëre oiye.”

Caquëna, Jesupi capi:

“Jaje pa'ito yë'ë yëi ñamare ñacaij'ë.”

17 Toasoñe acore seji'i:

“Simón Jonás Mamaquë, ¿yë'ëre më'ë yëquë?” Ja maca Pedro oi tsia nepi, toasoñe acore yëquë më'ë yë'ëre oiquë caquëna. Ja maca sehuopi Pedro:

“Ëjaë, më'ëpi si'aye asayë, yë'ë më'ëre oiye.”

Ja maca Jesupi capi:

“Yë'ë yëi ñamare de'oye ñacaij'ë. 18 Nuñerepa më'ëre cayë, ai posërepa pa'i maca, më'ëse'e caña suñani më'ë yë huë'ñana sai pa'isiquë a'ë. Jaje pa'iquëta'are ai huñou de'osi maca coa jëtëre nëocaina, yequëpi suñacaija'quë api. Ja maca më'ë saiye yëma'tona saja'quë api.”

19 Jaje Jesús cani capi: Pedro ju'iñepi Maija'quë de'loquërepa pa'iyë iñocai ja'ñere quëaquë. Ja jeteyo'je capi:
 “Tuijè'è, yè'ère.”

Jesús Oiquërepa

20 Co'iquë Pedro ñaquëna, i ai oiquëre papi Jesure tuji'i, Jesure tseama'në ao ai maca ja'ye ñu'i, “Ëjaë, ¿nepi coso yehuoja'cohua'i a'ni?” caquë sesiquëpi. 21 Pedropi ñani Jesure seji'i:

“¿Ëjaë, iquëreta'a me yo'oye pa'ija'coa'ni?”

22 Caquëna, Jesupi capi:

“Yè'è co'i macaja'a huajëquë iquë pa'ijaquë caquë pa'ito ¿iquepi më'ère co'acquë'ni? Më'è cato yè'ëni tuijè'è.”

23 Ja maca iye case'ere Jesús oiquërepa sehuosicohua'i jupëpi asahuë. Asani cuasahuë, iquë cato ju'iñe paja'quë api. Jaje Jesús cato ju'iñe paja'quë api caye papi. I cato capi: “¿Yè'è co'i macaja'a huajëquë pa'ijaquë caquë pa'ito iquepi më'ère co'acquë'ni?”

24 Iye coca toyaquë cato i oiquëpi toyayë, nuñerepa cocare quëaquë. Jaje pa'ina, nuñerepa cocare caji cajë asayë.

25 Jesús yo'ose'e jaiye pa'iji, pa'iquëta'are toyaye pañë. I yo'ose'e ñape toyañu'u cajë yo'ocohua'i pani toya saoye peoji, si'a yeja maca toya pëpi timë huesotoje. Ja yè'ta'api toyaye pati'ñe pa'io. Ca tëjihué. Jaje pa'ijaquë.